

【純愛】想要成為你的一半

作者: 仙台維他奶

Powered by [紙言](#)

第一章

「喂，風哥，出黎食個飯啦，考完DSE都成個月無見啦！」呀文打電話給我。

「You disturb me sleeping. Your turtle head will be barbecued!!!」我本來正在睡午覺，突然被他吵醒，心情當然不爽。

「做咩咁嬲呀，唔想黎就由佢，你就燒龜頭呀！」他說罷便掛了線。

自從DSE完結後，我每天都窩在家中，無所事事，吃飽就睡，睡飽就吃，整個人完全失去方向似的。

結果我一睡就睡到黃昏，隨便吃了個杯麵，接著便回樂天消磨一下時間。

順帶一提，樂天是我家開辦的音樂中心。

「喂，風少，咩風吹你黎。」Save哥問我。

Save哥比我大幾年，是我打機認識的戰友，後來我們混熟了，他想找份part time，於是我便推薦他來我公司當個reception。

我們聊了一會，突然被眼前的情境吸引着，不能自拔。

「唔該，幫我tick個名。」那個女仔向Save哥說。

「好，無問題。」

我扮作不經意的看了她幾眼，她身上散發出一種清新脫俗的氣質，一雙靈動的眼睛，泛紅的酒窩，僅僅及肩的淺啡秀髮，很像一個人，但我又記不起是誰。

她走進角落裏的房間，待到房門關上，我便打算開口問Save哥。

他卻搶先一步說：「你條傻鳩霖人呀，去馬囉！」

「CLS, 咁大聲想我死咩，不過條女真係幾正，好熟口面，但係又講唔出係邊個。」

「係咪金所炫呀？」Save哥奸笑着。

「無錯啊咁，屌你，識野唔，哈哈！」

我深呼吸了一下，鼻腔裏一絲淡淡的蹤跡像要告訴我生命是充滿希望，是自從那個人無聲無息的離開後從未有過。

看來我找到奮鬥的目標了！

第二章

但一回想到這些年來我從未為自己走的路作一次主，吹長笛、練水、高中選科.....所有事都只為了滿足別人對我的期望，這些是我想要的嗎？

是，又好像不是。我已經18歲了，是時候任性一次，那怕又一次受傷，跌得滿面瘡痍，我也絕不後悔。

我再不會用理性壓抑內心的期盼，做自己想做的事，反正我也沒甚麼可失去。

翌日我回去樂天向Save哥探料，預備我的追女大計。

「喂，上次條女幾時再黎上堂？」我問Save哥。

「你條能樣黎真呀！呢啲係客人嘅私隱，我唔講得架。」Save哥一臉正經地說。

「同你講笑咋，星期四9點，中級長笛。諗好點接近佢未呀？」

「反正我又無野做，下次開始sit堂囉，長笛我搵手小菜啦，吹番幾首鳩歌實溝到佢。」我露出一副不可一世的模樣。

「笑撚死，講到好似好易咁，u are just a 青頭仔，雖然我都係，哈哈！」

「Save學野啦，我話晒都係呢個SJC林峯，放手放開所有~」

「林峯？你啲fd呀文呀水成日都笑鳩你係度chok撚樣，咪玩啊叔啦！」

「收啦！佢地唔底得我有錢過佢地，又靚仔過佢地，chok樣識條鐵咩佢兩個！」

「風仔，下次睇你表演。」Save哥恥笑着我。

接下來的幾天我經歷了不少的內心煎熬，心裏總有一把聲音叫我放棄，放棄的話我跟以前那個懦弱的自己又有甚麼分別，當時已經錯過了一次，我跟自己說過

「我係唔會犯同樣嘅錯誤 Twice!!!」

這一次就毫無保留的講出自己的心意吧，絕對不會再逃避。

第三章

這一天終於都來臨，我的人生會有一個新開始，還是依舊停滯不前？

我緩緩推開玻璃門，不知道是不是緊張的緣故，此刻感覺那到門有如千斤重的，由門口走到鋼琴房的步伐也是如斯沉重，但一想到能再見到她，內心的興奮便按捺不住，

為了讓自己冷靜下來，我對自己說「上啦，呢個世界無女你係食唔到嘅」

入房後我和導師的眼神對上了，他好像嚇了一跳。

「呀風哥仔，你做咩上呢個course嘅，你之前應該上左架。」曾經教過我的黃sir一臉疑惑。

「你當我無聊得滯，求其搵堂上囉，我唔會阻住其他人。」我隨便編了一個藉口。

「Ok，你係太子爺，你話點就點啦！陣間仲有個女仔黎上」黃sir笑說。

話未說完，「所炫」終於來了，人家等了你好久哦！

「Chloe，開始上堂啦，今日有一位新同學。」

「Hello，我叫呀風。」我尷尬地傻笑着。

「你叫我Chloe吖。」她向我報以一個微笑。

她笑着的樣子看起來更可愛，雙眼眯起來像一對腰果，我不行了，這種甜美型的女仔是男仔都會喜歡的類型吧。

「上堂啦。」黃sir的說話讓本來看得入神的我回過神來。

「好啦，今堂繼續講返氣量控制，跟住再講下兩首古典作品.....」黃sir開始講解。

那些內容我早就聽過，完全提不起勁去聽講，加上我的心早已飄向鄰座的她，只顧着有意無意地偷看那張俏臉。

她全神貫注地聽着講解，完全沒注意到我淫邪的眼神。

「好啦，今日就黎到呢到，下堂再繼續，byebye」黃sir扭了一下手腕。

「Byebye啦，呀風，我地下堂見啦！」Chloe說完便快步離開了。

「嗯，Chloe，下堂見。」我不敢直視她。

我一方面遲疑到底是否要追出去，問她拿個電話，另一方面在想會不會太猴急，她會不會把我當成狗公。

不要管太多了，誰叫你愛上人家。

我一個箭步衝出街上，也趕不及了，她早已消失在茫茫人海裏。

街上一對對的戀人像是要恥笑我這個怯懦的單身狗，連這麼簡單的一句話也開不了口，還妄想食女。

總算揭開了序幕，縱使只是一小步，稱不上甚麼，但有一句說話我一直都深信着「你而家無，但將來會有」，你們放長雙眼瞧著吧！

第四章

「喂，睇波呀！」呀文大聲向我呼叫。

「砰！」那股衝擊力使我猶如中槍一樣，立馬倒下，此刻的我絲毫感覺不到肉身的痛楚，只因心早已飄泊遠方。在場的其他人看過來，紛紛恥笑着那個超級大傻仔。

「發咩夢啊你，起身啦！」呀文伸出友誼之手，將我一把拉回現實。

「無.....無呀，唔夠訓啫。」我隨便敷衍他。

「係咪煩緊點溝女呀，睇你個闊樣就知啦。」

「你點知架？」他完完全全看穿我的煩惱。

「仲有啲咩，錢你又大把，實係女啦！」呀文露出一張自信的臭臉。

「唉，都唔知點同佢拉近距離，點樣先唔會太刻意？」我雙手抱頭躺在地上。

「你搵啲人啦，我可以幫到你，不過找左數先。」他指着我的褲袋。

「擺去洗啦，臭鴨！」我掏出了一張金牛，狠狠地扔向他的臉上。

「多謝風爺，條女你點識架，講黎聽下。」呀文立刻變了臉，對我的景仰猶如滔滔江水連綿不絕，又如黃河氾濫一發而不可收拾。

我簡單跟呀文說了一遍目前的經歷，只見他一直在玩電話。

「你有無聽架，掛住打機，擺番錢黎！」

「得啦，我有聽啊，暫時進展都ok嘅，下次見面你求期搵啲野吹下，再約佢食飯。佢無say no，就啱下對你都有啲好感。」呀文胸有成竹地說。

「咁.....啫係點啊？」我還是摸不著頭腦。

「唉，你咁樣點溝撚到女啊，最緊要係投其所好，搵啲共同話題，黎黎去去都係個啲鳩劇，Kpop個啲啦，唔得咪教佢吹笛，so easy！」呀文拍曬心口。

我回家後一口氣追了幾套劇，無限loop最近的hit歌，不看也不知道自己快要被時代淘汰，那些歌手演員我大多都叫不出名字，完全搞不懂為何人們總愛看無腦膠劇、洗腦情歌，還是隨便看看罷了。

反正人帥就有女，這些機會只屬於我的，你們乖乖看文打丁吧！

第五章

又到了星期四，我深呼吸了一下便進去上課。

「Ok，齊人就開始啦！」黃sir冷冰冰地將逐隻字吐出。

「Hi！」Chloe跟我打了個招呼。

「Hi！」我尷尬地傻笑着。

這次我又再沉溺於眼前的美好風光，完全無法集中聽講，黃sir也似乎留意到，不過他沒理會我，畢竟某程度上我是老闆，從來沒有人敢動我一條毛髮。

「Take個break先，5分鐘之後再繼續。」黃sir說完便走開。

嘻嘻，到我表演了，昨晚的苦練終於大派用場，我閉上眼，裝作深情地吹奏那首大熱台劇的片尾曲。從來沒有人能抵抗皮仔的魅力，一舉手一投足，足以醉倒無數少女，想必她也不會例外。

Chorus結束後，我別過臉，不敢直望她，平時我早已習慣成為同學們的笑柄，然而不知為何此刻竟然有點怕柒，或許這就是愛情的魔力，令我第一次覺得洩底，多麼害怕面對失敗。

拜託，給我一個回應吧。

我偷望了Chloe一眼，只瞧見她雙眼發光，仿佛要告訴我她從心底裏對我的崇拜。我心裏暗爽，這晚你死定了！

「嘩，點解……」

「上堂啦，你地落左堂先溝通溝通啦。」黃sir完美地破壞了浪漫的氛圍。

我心想「你做乜阻鳩住我溝女，係咪想燒春袋！」我向他做了一個插春袋的動作，他看到我兇狠的眼神，身子震了一震，不敢跟我對望。

Chloe收起了剛才仰慕的眼神，流露出一絲絲失落。

之後我一直睡到下課，濃濃倦意一把澆熄了剛才燒得正旺的熱情，直至她將我由無底深淵中拉了出來。

「係呢，你得唔得閒食個飯呀？」Chloe笑着對我說。

「吓？」我有點愕然。

「做咩，你唔得呀？」

「得...得呀，我未訓醒，sor」我低着頭說。

Chloe掩着嘴笑，轉身走向出口。

太可愛了，我永遠都不會忘記她的笑容，那個專屬我的笑容，沒有人能得到她！沒有人！沒有人！

第六章

「喂，你想食咩呀？」Chloe的聲音很溫柔，在腦海裏來來回回縈繞着，整個人軟了下來。

「嗯...我無所謂呀.....」我有點結巴地說。

「咁不如食M記啦，我想試下個新包。」

「吓，你認真㗎？」

「你唔好以為女仔成日都要食啲貴野先得㗎，靚女就唔會屙屎咩？」

我心想竟然有女仔跟我食M記，和之前那些當我是人肉ATM的港女簡直是天壤之別。

買好餐後，一開始我們都是默默的各有各食，彼此也不知道該談論甚麼話題，氣氛相當尷尬，旁人看來就像兩個陌路人在搭抬。

「係呢，點解你會叫我一齊食嘅？」

「唔知啊，硬係覺得同你好似會幾啱傾囉。」

「哦。」

「係啫，差啲唔記得問你，你吹笛咁勁嘅，想見你想見你想見你都識。」我被她突如其來的問題嚇了一跳。

「麻麻地啦，聽聽下幾好聽咪玩下囉。」我的語氣帶點輕佻。

「嗯，套劇都幾好睇，好耐無睇過咁正嘅偶像劇。」

「我都咁話，主角將兩個角色演得好細膩，懸疑位做得唔錯。」

「係啊係啊，劇情又鋪排得好好，又表達到唔同年紀嘅價值觀。」Chloe越說越興奮。

「嗯，估唔到你都咁鍾意睇。」

「不過點解你咁勁，仲要報呢個course？上堂訓覺唔覺得晒錢咩？」她一臉疑惑。

「咁你又點解報嘅？」我又問去她。

「考完DSE無乜野做，咪學返囉。」

「嗯，我都唔想架，考完試呀媽見我太得閒咪逼我上。」我心想「唔痛話你知我想溝你先上咩」

「頭先你吹首歌又真係幾型。」Chloe雙眼發光。

「係咩？」

「頭幾秒係嘅，不過後尾就有啲柒，哈哈！」雖然她笑得有點賤，但我又沒有感到生氣。

「妖，你有我吹得咁好聽咩？」我面露不屑。

「你黝呀，講笑咋！」

「咁啫係型定柒呀？」我對她完全沒有辦法。

「Ok型啦，唔講住，我夠鐘要走，下次見。」Chloe執拾好，準備動身走。

「Chloe，你可唔可以俾個電話我，難得我地咁好傾。」我想她應該不會拒絕我的。

「好吖！得閒搵我傾下計啦，bye~」Chloe給了我電話，笑了一笑便轉身走了。

那一晚我無法入睡，腦海裏滿滿都是她的畫面，她的氣息、聲線以至那傾城的回眸一笑，我已經等不及再見到她，一面也好。

第七章

「喂，得左啦，我擺到Chloe電話啦！」我跟Save說。

「邊撚個Chloe，上次條女？」Save漠不關心似的。

「我地幾好傾，佢仲同我一齊食野添。」

「真係恭喜你呀，你老豆老母知道一定好開心啫！」Save不懷好意地說。

「咪玩野呀！比佢地知實搞禍都似。」

「講下笑都唔得，話時話，我都有佢電話啎。」

「So，想同我鬥，你未夠班呀，哈哈！」我不知從那裏來的自信。

「知你溝死女啦，聽呀文講之前有個miss都俾你搞掂左，風爺太犀利啦，過小弟兩招旁下身。」

「無啲咁嘅事，我要屌都唔屌呢啲啦，呀文條能樣又係度玩鳩我，唔講啦。」我把電話掛了。

在沒有Chloe的日子，我每天不是打機，就是跟呀文打球。這樣的日子真的很難捱，思緒無時無刻都充斥着她的一切，揮之不去，根本沒有動力去做其他事。

每當我一看到她上線，心跳就會加速，心臟幾乎快要裂開，難道這就是人們說的相思之苦？不，只有我在想念她，這僅僅是單思而已。

自從拿了Chloe的電話，我們都未有send過message，更別談甚麼聊電話，也許她只當我是一個hi-bye friend，又或是她壓根沒注意到我的存在。

我拍拍臉龐，不斷默念着自己不能再這樣膽怯，要食女就要豁出去。為了消除我們之間的隔膜，我做了一個大膽的舉動，向她傳送信息，還附上那個...那個...sticker。

屌！藍tick左，死就死啦！

沒錯，就是那個精心設計的本人招牌chok樣的sticker！（想要請pm）

Send了message後，一想到很可能再次在Chloe面前丟臉，悔意瞬間侵襲我的心頭，此刻忐忑的心情比考DSE時有過之而無不及，忐忑是因為我知道結果不一定按照劇本發展，決定權不在我手裏，傾出所有到頭來也可能一無所獲。

那怕我的演技是如此爐火純青，感情是多麼真摯，只要監製把我踢走，我就不能一直演下去。我現在的處境相當被動，唯一能做的事就只有等，我的命運終究再被別人掌控，但這次我甘願接受，因為掌控的人是你，Chloe。

好了，終於看到她的status由在線上變成輸入中，短短幾秒仿佛是我一生中最漫長的時刻，時間似是凝住，空氣不再流動。

「你做乜send個咁膠嘅sticker黎 笑到我噴飯」

「無呀 諗住你會掛住我個靚仔樣咋嘛」

「你知唔知醜架 邊有人咁chok樣 我要洗眼呀」

「你識唔識野架 我係人稱沙咀道林峯 屌打個奶共Jackson啦」

「你繼續吹」

就是這樣，我們一直聊下去，話題好像說之不盡，不知何時才停下來。

謝謝你，給我一個演出的機會。

第八章

一大早醒來，又是指定動作，到龍門冰室吃個all day breakfast。

我叫了個外賣，然後在門口等，誰不知湊巧遇上她。

「阿風，咁都撞到你嘅！」

「係咪好掛住我呢，baby」我抬頭一看，馬上施展大師級chok樣。

「你無撚野啊嘛！」Chloe向我投以嫌棄的眼神。

「This is so called definition of chok，細路女唔識㗎喇。」

「屌你，俾你搞到無晒胃口啦。」

「啱囉，唔食咪減到肥，嘿嘿。」

「咩話，我邊度肥呀！」Chloe使勁搵我的手臂。

「啊！係喇你唔肥，仲好fit添。」

「算你啦，放過你。」

「你又嗌外賣啊？」

「係啊。」

「er... 你上唔上黎我度食呀？」我拍拍她的膊頭。

「淨係得我同你？」

「係呀，你唔想都...」

「好吖。」Chloe還未待我說完就一口答應。

我們拿到外賣便一起走回我家。

「嘩，你屋企咁大嘅！」Chloe一臉嘩然。

「麻麻地啦，快啲食野，好鬼肚餓啊！」

「嗯。」

正當我打算動手時，她目不轉睛地盯着我的沙嗲牛肉麵。

「做咩眼甘甘，你想食我個啲呀？」

「好似幾好食咁，share啲俾我吖！」她用楚楚可憐的眼神看着我。

「想食都得，不過要我餵你啲。」

「咪玩啦。」

「咁就算啦。」

「你話點就點囉。」

「啊...」我遞了幾小片牛肉至Chloe的嘴邊，示意她張開嘴。

「到你啦。」

「咩呀？」

「咁囉。」我靠近她，然後指指嘴邊。

「唔知醜。」

「唔公平，你食左我個啲，我又無得食返。」我用雙手托住下巴，chok出一把嬌嗲的聲音。

「男人老狗咪咁核突啦，餵你食啦。」

如是者，我們一人一口的餵來餵去。

吃完早餐後，我提議看The King: 永遠的君主，因為我知道她很喜歡李敏鎬。

「好啊，最近幾集我都未睇。」

看了十多分鐘，我已經打不起精神，劇情不怎吸引，時間線又混亂，不知不覺間就睡着了。

「喂睇完啦，快啲起身。」Chloe搖搖我的手臂。

「比...我瞓...多陣啦。」

「唔好挨落黎，好鬼重呀！」Chloe一把推開我的頭。

「啊...條頸好痛啊！」我使計玩弄一下她。

「你無事吖嘛？」她把臉哄過來。

「你扶一扶我起身先。」

「啊！」Chloe想拉起我，怎料不夠力，整個人跌向我身上，就這樣我硬食了一記波餅。

「er...你自己跌落黎咋，我無抽你水架。」

「都唔關你事，係我唔夠力啫。」

此刻我們之間只有一隻手指的距離，很清晰地聽到她急促的呼吸聲，相反我卻被她壓得呼吸都有點困難。

「你起返身先，我郁唔到呀。」

「Sorry Sorry，你仲痛唔痛啊？」

「無事呀，玩下你咋。」我摸着頭傻笑着。

「哼，唔睬你呀！無乜野我走先喇。」Chloe語畢便急急忙忙離開。

關門聲讓我從剛才被她胸壓的感覺抽離出來，我恍然一想，Chloe有沒有發現到我下面扯了？

她該不會氣了我，以後都不理睬我吧？

第九章

「Chloe，你係咪仲因為上次件事唔開心啊？」我見Chloe神色黯然。

「無啊。」她淡淡的說。

「但我見你好似有啲唔開心，你唔怕同我講啲。」

「嗯，好難同你解釋清楚，一陣你陪我見個人，你就會知啦。」

「好啦，無論發生咩事都好，我都會陪住你，支持你。」

「真係？」

「係，我地係friend咁嘛。」我拍拍她的肩膀。

「多...多謝你！」

「你唔係一個人架，我永遠都會係你身邊。」這句話我很想說出口，但懦弱始終使我卻步。

到底是甚麼事能令Chloe如此困擾，是她和男朋友分手，還是他發現了我這個情敵，要她離開我吧？不...不會吧！

照道理說，Chloe應該沒留意到我對她有意思，更何況.....

夠了，我告訴自己不要再胡思亂想，或許事情沒我想像中那麼複雜，可是她雙眸裏的迷惘像是要證實我的想法。

「行啦，我ok架，你唔駛擔心我。」儘管她口裏是這樣說，不安的神情始終掩蓋不住。

有個男子急步走向我們，Chloe的神情很愕然，整個人完全冰封似的。

「點解要分手呀？我仲好愛你架，唔好再撚我啦！」那個男還算帥，身型不錯，不過就完全不是我的對手。

「夠啦，藍祐天！次次都係咁，叫我原諒你，轉頭又去搵返佢，你有無諗過我感受架？」Chloe拉高聲線。

「我同佢完左㗎啦，以後我剩係愛你一個，你信我。」藍祐天拉着Chloe的手。

「你唔好掂我啊！我同你無可能，你以後唔好黎搞我，我有男朋友架！」Chloe一把甩開他的手，然後拖着我的手。

「呀風，我地走啦。」她牽着我的手一直跑，一直跑。

被心儀的女孩拖着手是我日思夜盼的事，此刻卻難以分辨眼前的畫面孰真孰假，到底我是不是在發夢？

不，她手心的溫暖提醒我此刻是無比真實，切切實實感覺到活着是多麼美好。可以的話，我絕不放手。

茫茫路，但願有我陪你一起走。

第十章

就這樣我們不知跑了多久才放下腳步。

「呼...呼...」Chloe大口大口地喘息着，她似乎沒意識到我們還是手牽着手。

「頭先...點解...」我有點結巴，畢竟有些說話是難以啟齒的。

「Sorry，我借你過橋，話你係我男朋友。」
她連忙鬆手，避開我的目光。

「唔緊要，幫到你就得，定係你真係認真，想我做你...咩...」我試探一下她的口風。

「吓！」Chloe反應不過來。

「我估唔到你原來鐘意我，無計啦，鬼叫我型過嗰個咩祐天咁多咩！」我戚戚眉。

「人地邊有嗰，你唔好咁得戚啊，以後都唔睬你架！」她心情好了點。

「你無事，咁我走先啦。」我佯裝離開。

「喂，你係咪男人黎架，就咁丟低個女仔係度！」Chloe嘟着嘴說。

「講笑啫，唔捨得我呀？」她左右擰着臉，我就一直跟着她轉來轉去。

「係啦，怕左你！」Chloe終於笑了。

「笑返咪靚女囉！」我用手背替她拭去臉上的一點點淚珠。

「夜啦，我送你返屋企。」

「嗯。」

「係呢，你做乜唔問我同佢發生咩事？」

「你想講就會講架啦。」這個時候女仔往往需要的只是簡單的陪伴，令她安心就可以，不必要的說話反而會勾起她的刺痛。

我們並肩沿着海旁，緩緩走向她的家。路途說遠不遠，說近不近，走着走着就到了大廈門外。

「今日好多謝你，唔係你我都唔知點算。」Chloe低着头說。

「佢再黎搞你，我唔會放過佢！」

「點解你要對我咁好？」

「er...er...因為...你係我...朋友。」我始終不敢表達我的心意，為甚麼？我怕，我怕，一開口連朋友也沒法做。

「就係咁？」她的眼神看來好像有點失落，是不是我看錯了。

「係...」

「好啦，我要走啦，你真係無嘢要同我講？」

「...」我說不出口。

「咁bye bye啦」見我沒有回應，她皺了皺眉便轉身離去。

我很想走上去緊緊摟住她，讓她依偎在我的胸膛，將暖暖的溫熱傳達到她心裏，奈何我終究踏不出腳步，只可看着背影慢慢消失在我的視線範圍，看似觸手可及，又偏偏怎樣伸手也碰不到，這種距離難道就是曖昧嗎？

第十一章

經過這件事後，Chloe漸漸敞開心扉，和我多了聯絡，對彼此的了解也加深不少。

「呀風，你將來有啲咩打算，見你成日都好似好hea咁。」有次Chloe問我。

「唔知啊，入U之後玩多幾年先啦，grad左先算。」

「其實我唔多鍾意啲啲無夢想、無目標嘅男仔。」

這句話使我恍然大悟，仔細想想才發現自己這些年根本沒想過未來，每天但求得過且過。

「打下籃球掛，搵啲比賽玩下咁。」我隨便說說，難道跟你說「我剩係想溝你咩」

「有機會我黎睇你打波好唔好？」Chloe好像很興奮，看來我是自找麻煩。

「好吖，我怕你見到我咁勁會愛上我咋！」我眨一眨眼。

「我唔信，你條柒頭實輸到喊住叫呀媽！」她用鄙視的目光瞪着我。

「到時睇下點。」

到了這個地步，我也沒全身而退的餘地，只好拜託呀文替我牽紅線，看看能不能加入他那支業餘球隊。

「我同教練講左啦，咁啲隊波走左2件，佢話下次過黎一齊練波。」呀文拍拍我的膊頭。

「啫係我地遲啲有得一齊落場打？」

「有機嘅，我地班人唔算好勁，我要做第一得分點你就知啦。」

「唔撚係呀？」我驚呼一聲。

「過幾日你就知㗎喇。」到了第一次練習的日子，我提早半小時到達場館，稍作熱身，順帶試試手感。

「咁早啊男神風，你今次嚟真啲，平時約你遲成個鐘都試過。」呀文對我揮手。

「我要證明比一個人睇我打波係得架。」

「哦，之前叫你入又係咁推，原來係為左女女！」

「你地吹完水未呀？開波啦！」有個飛機頭大叔在場邊怒吼。

「同你介紹返，呢位就係我地教練，Lue Sir！」呀文拉我過去他面前。

「呢個肥仔就係你上次講個friend，睇落都ok，埋位試下。」一開始就分隊打練習賽，我和呀文一隊，我打分衛，他打小前。

「仲記唔記得我地個組合名？」開球前，呀文向我伸出一個拳頭。

「咪撻玩啦，咁中二病！」我懶得理他。

「黎啦，上次餐飯唔駛你找數。」

「好啦好啦。」

「文風喪膽！Let's rock it！」

第十二章

比賽開始，我隊中鋒跳贏了球，呀文撿到球，不疾不徐帶過半場，他眼神示意我走位，我加速跑到底角，舉手要球。呀文作勢分球，隨即壓低重心，直接收球，過掉對手，輕鬆上籃得分。

之後幾次進攻基本上都是由呀文發動，控衛一運球過半場就塞球給他，這難道就是威名遠播的「球給23號」戰術嗎？

錯了，是「球給3號」！呀文迅猛的first step，過人就如食生菜，和中鋒的擋拆也配合得天衣無縫，如此他倆頻頻在籃底得分，打得對方懷疑人生。

在對面嚴守禁區的情況下，我也把握機會在外圍開火，投進3球空檔。防守方面，對方攻力頗弱，未能對我方籃底構成威脅，只能在外圍擲骰子，碰碰運氣。

下半場打了不久，Lue Sir就換走呀文，得分重任就落在我身上，沒辦法，誰叫隊友們的持球能力偏弱，基本上沒甚麼自主得分能力，加上中鋒都是食餅型，於是他們不斷塞球給我。

我採用了平常街場的打法，嘗試在低位打開缺口，用身型背籃強攻，屢試不果，瘋狂遭受包夾，想傳又給封死線路，推到籃底又給內線協防。結果我只能硬切硬投，全場17射5中得11分，終場僅小勝2分。

之後呀Sir跟我們作簡單的賽後檢討。

「屌！下半場咁打唔多掂啲，無左3號仔你班撻樣就唔識打波咁，個個係度妹下妹下，企定係度睇波，做多啲ball movement，鐘唔到入去就做下off ball screen, double drag啊，幫射手拉啲空間，猛咁俾肥仔iso玩條春咩！」臨走前，Lue Sir叫停我。

「喂，你過黎，望咩咩係你啊！」他指着我。

「呀Sir，叫我乜事？」我全身僵硬，幾乎腳軟。

「開波個陣你打得ok，啲走位啲起手做得幾好，你防守啲橫移、對抗性都唔錯，過screen腳步都幾好，不過之後就唔知打乜鳩，低位剩係識硬推，無腳步無假動作，啲急停中距離直頭係亂黎，入到你好彩咋，真係落場你實比人block傻都似。」

你都係做好自己本分算啦，專心打好無球，唔好攞住粒波亂衝亂射，打到成個Wesley Matthews咁，打波最緊要係清楚自己定位，收到未？」

「收到！」

「唔撚同你講住啦！我要接個女放學，下次醒定啲呀你！」

經他這樣一說，我才知道自己的球技有很多不足之處，現在去追趕還來得及嗎？我絕對不能放棄，要證明給她看我能做到的。

第十三章

曾經有一個人對未來不再期盼，以為人生終究只是不斷循環，重複做着機械化，了無新意的事情。

生命裏欠缺衝擊、激情、希冀，逼使一個過去憧憬着美好將來的男孩經歷所謂的成長，逐漸變得冷酷無情，對任何事都漠不關心，終究成為自己小時候最痛恨的人。

身邊的人事令他不再付出真心，慢慢疏遠曾經的摯友，為了不被排擠，傷害好友也無動於衷，甚至在權貴面前裝出一副卑躬屈膝的嘴臉，視尊嚴為無物，

內心深處的梦想和衝勁早已化作雲淡風輕，行屍走肉彷彿成為了他專屬的代名詞。

中學生涯的完結卻為他的未來帶來一點曙光，短暫的逃離社會給予他一個機會稍作歇息，空閒的時間讓他反思自己的價值。

此刻的他無需帶着面具，坦蕩蕩地嘗試做回自己，方始醒覺他仍然是他，小時的童真、熱血並沒有消磨殆盡，他慢慢找回初心，向着當初的目標邁進。

在他身邊，有幾個人從未離棄過，一直堅信真正的他終將歸來。

陳澤風，他知道世界令他失望過，但他又何嘗不曾令世界失望。他答應自己不會走回頭，絕不後悔。

第十四章

「喂，我諗之後都唔再上堂啦。」我又如常的跟Chloe通電話。

「點解嘅？」

「唔想浪費時間係啲唔鐘意嘅野，sorry，以後我同唔到你上堂。」

「唔緊要啦，你搵到想做嘅野咪幾好。」

「嗯，我入左隊波同埋要開始操下體能，追返之前嗰左嘅時間。」

「聽你把聲好似成個人唔同晒咁。」

「係咩，唔知點解突然之間好有衝勁咁。」

「唉...」Chloe嘆息。

「咩事啊？」

「你以後唔返咪少左機會見面囉。」

「小姐，掛住我呀？」

「掛你個頭！」

「做咩咁惡嗰，你唔想見到我就算！」

「喂啊，人地都唔係咁嘅意思，咁...er...你...星期日有無時間？」

「你想約我呀？我ok呀！」

「邊個話我約你架，衰人！」

「黎啦，求下你，好無？」我苦苦哀求。

「怕左妳，到時睇下點。」

「我當你得架喇，bye bye」我難掩興奮的心情，大力跳了幾下。

引頸以待多時的日子終於來臨，以後就不用沉寂在虛無縹緲的幻境，真實地和Chloe近距離接觸，浸染在她動人的甜笑和溫婉的聲息。

一想到這些畫面，小風便扯了，全身熱血沸騰，慾望一發不可收拾，難以平靜下來。

我恨不得現在就把這個小賤人就地正法。

第十五章

之後呀文又約了我一起打球。

「砰！」我賞了一個大火鍋給呀文，搵走那必入無疑的上籃，然後怒瞪着他。

「屌，乜撻野啊你！」他嚇得目瞪口呆。

「呀！呀！好耐都無試過咁爽！」我仰天長嘯，將壓抑多時的怨氣一口氣釋放出來。

「你返黎喇，呢個咁有火嘅先係我識嘅呀！」他一拳揮向我心口。

「而家返黎仲未遲啊嘛？」

「碌柒啦你！」

「而家係20XX年5月30日11點37分，我想你見證住...由呢一分鐘開始，陳澤風浪子回頭，重新出發...」我指着手錶，耍酷地撥了幾下頭髮。

「跟我一齊做，正能量正能樣！」呀文打斷我的話，chok了個仆街樣。

「屌，俾你搞到無晒mood呀，柒頭！」

「好嘔心囉，講埋啲咁嘅野，我唔係你啲女屌你！」

「嘻嘻.....」我嘴角含春。

「笑乜鳩啊！係咪搞掂左佢啦？」

「未呀，都唔知點好，人地啱啱先分左手，廢事佢覺得我乘虛而入啦。」

「咁你咪試下佢囉。」

「點試？」我一臉茫然。

「搵下機會唔覺意做下身體接觸，拖下手仔，佢無縮就啱係...哈哈...哈哈...」他的笑容非常淫褻。

「有無簡單啲架？」

「咪話我唔醒你，直接啲，歌都有得唱~能風揸波簡單過壞燈膽~」呀文雙手使力地抓着籃球。

「揸都揸你先啦！」我飛身撲向他。

「吖！吖！唔好呀！好爽呀！呀風我濕晒啦！」呀文使勁地呻吟。

突然我感覺到其他人的目光都聚焦在我們身上。

「咪玩啦，人地望住呀。」我輕聲對他說。

「死啦，佢地實以為我基啦屌！」呀文面容扭曲。

「閃啦，俾人拍埋片，仲使出黎撈！」之後我們立刻逃離現場，依稀聽到甚麼「好基友」、「係愛啊」，太嘔心了吧！

第十六章

回家後我仔細想想，呀文的方法應該行得通。仲唔係第二個，實係咁啦！

這一天是我們第一次正式約會，不計上次吃M記和外賣的話。

一起床照鏡時，我才醒覺自己的外型是多麼的落伍和頹廢，身為一個藝術家(誤)，不修邊幅是常識吧，但我竟然第一次如此介懷自己的打扮。

正當我苦苦思量該如何打扮，電視的一個人影使我靈機一動，就這樣決定，Chloe一定會對我的新造型另眼相看。

於是我找了一盒染髮劑，再稍為用髮蠟gel頭，就這樣輕易模仿了那位著名比利時藝術家的造型。

老豆也被我的新造型嚇呆了「唔撚係掛，迪布尼黎嘅喂」

打扮好後，我便撥電話給Chloe。

「喂，你記唔記得今日約左我呀？」

「下，有咩？我唔知喎！」

「小姐，咪玩啦，最多我請食飯喇！」

「同你玩下啫，你話你請架，咁一陣12點銅鑼灣Sogo出面等啦~」

「無問題！」我已經早了10分鐘到達，想不到Chloe已經在等我。她今天的打扮跟平常沒太大分別，白色T-shirt加牛仔短褲，若隱若現的展露她姣好的身材，太正了！

「Hello，Chloe，咁早嘅？」

「你都係咩。」

「喂！賤人，你望夠未呀？」她發現我一直盯着她。

「我...無...啊...你今日...好靚...」我摸着後腦傻笑。

「多謝，你都唔差，不過唔知點解好似係邊度見過你呢個look，好熟口面咁。」

「係咩，我參照一下比利時當代藝術大師 Kevin De

Bruyne啫。」我把他的名字唸得很快，以免她發現。「乜de...ne話？」

「唔重要啦，佢都唔夠我靚仔！」我單一單眼。

「超，靚條毛！」她一臉不屑。

「唔好講呢啲啦，你肚餓未啊？」

「少少啦，食咩呀？」

「行啦，陣間你就知。」

「古古怪怪咁，唔好玩我呀！」

「點敢呀靚女，係都比你玩啦。」

「口花花！」我帶了Chloe到一間高級西餐廳。

「會唔會太貴呀？」她在門外拉住我的手。

「得啦，同你食緊係要食好啲。」

「嗯...」Chloe對着我甜笑。

我們安坐好後，有個熟悉的身影朝着我們走過來，他的眼神不懷好意，意味深長的微笑使我心頭一顫，怎麼他會在這個時候出現，拜託，你當看不到我吧，不要來找我麻煩。

第十七章

那個人向我揮手，想躲也躲不了。

「喂皮仔，咁啱撞到嘅？」

「係囉，又會咁啱，哈哈！」我尷尬地微笑。

「呀風，呢位係...」Chloe問道。

「佢係我中同，雲加迪，Dick」

「你地拍拖吖，咁我唔阻你地啦。」

「唔係啊！」我和Chloe同時大叫。

「人少就認左佢啦，咁有默契。」

「鬼同佢有默契啊！」Chloe扁着嘴說。

「我地無野架，你唔好同班友講，打鳩我都似。」

「點會呀，我似啲咁嘅人咩？」Dick戚戚嘴角。

Dick銷魂的眼神看似找到了新獵物，身軀蠢蠢欲動，旁人一眼就看出他對Chloe不懷好意。

「靚女，介唔介意借皮仔過黎用下？」

「隨便啦。」Chloe一臉不在乎。

「搞錯呀，你條傻鳩做乜唔介紹我識呀，條女咁正。」Dick把我拉到一邊的角落。

「介紹你識，你條狗公想點我唔知咩，靚仔大晒呀，全世界啲女俾你食晒，公平咩？公平咩？」我心裏默念。

「邊係呢，同你平時食開啲女差好遠啦。」

「唔係吖，白白淨咁，腳又長又滑，幾pure幾true，實係處啦！」

一聽見其他人對Chloe有非分之想，心裏就揪住揪住，一股莫名的憤怒不自覺的衝上心頭。

現在的我終於明白那種對意中人的着緊，一看到別人淫邪的目光，心裏很難不耿耿於懷，不想他人感受她的美好，那管只是一點點。

「你諗都唔好諗呀！搵食行遠啲！」

「又唔係你條女，你理攞得我！」他露出一副不可一世的臭臉。

「總之就唔得啦！佢係我好朋友，我唔准任何人傷害佢！」

「同我鬥，你憑咩呀？」

「起碼我係真心對佢，唔似得你周圍係度flirt女，抵你成世都溝唔到女！」

「咩話！你夠膽就講多次！」他氣得怒火中燒。

「永遠都溝唔到！阿記擺到英超冠軍都未輪到你條柒頭！雲加迪屌你老母！」

「陳澤風你好嘢，我有排同你玩呀！」說罷他便氣沖沖地走了。

我也不知道那裏來的勇氣，也許這就是愛的力量，為了守護身邊重要的人，渺小的我竟然瞬間充滿力量，不自量力地與風頭蠶對抗。暗爽了幾秒後，我回過神才驚覺這次真的惹麻煩了！

第十八章

「呀風，佢搞咩咁嬲啊？」Chloe問我。

「無事，我地叫野食啦。」我勉強擠出笑容。

「係人都睇得出有野啦，你唔怕話我知啫，我唔會同其他人講嘅。」

「er...er...」

「你信唔過我咩，嚟啦，話比本小姐知，陳同學！」

「唉...好啦，我講啦，本來諗住grad左之後都唔駛理呢班人，點知又黎搞鳩我，今次死喇！」我深呼吸一下，再說道。

「佢地好惡㗎？」

「都可以咁講，你唔理佢堆就當你敵人，我咪焗住埋囉。」

「你無啦啦又會得罪佢嘅？」

「頭先佢話要...你...總之就...唔係好野啦！」

「你唔想佢溝我呀？哦...你呷醋！」Chloe指着我恥笑。

「痴線...邊...邊有啊！」我紅都面晒。

「你咪認左佢囉，我又唔會笑你嘅。」

「喂，好啦啫你！」

「做咩啫，Sor...Sorry囉。」她收起笑臉。

「唔玩你啦，咁你鍾意啲咩類型嘅女仔㗎？」

「...」我無言以對，低頭迴避她的眼神。

「你唔想講都ok，當我無問過啦，哈哈。」

「嗯。」

話語間忽然瀰漫着尷尬的氛圍，於是沒再延續這個話題，我們都沉默不語，只顧低頭進食。

吃完飯後，不安的氣氛絲毫沒有減退，彼此眼神閃縮，生怕又再說錯話。

為甚麼我會這樣着緊她？該不會是那種感覺吧？

我也不敢肯定，跟當時有點像，沒想到過了幾年，我以為自己成長不少，應該能分清楚愛情和友情的界線，到頭來我還是那個懵懂的小伙子，在愛情路上一直原地踏步。

不過這次我不管那麼多，不再掩蓋自己的心意，決定付諸行動，告知她我心坎裏的感覺。

終於我們的眼神對上了，剛才怒罵雲加迪的熱血驅使我作出自己也預料不到的行為，一下子緊緊捉住Chloe的手。

「做...做咩啊...」Chloe被我突如其來的舉動嚇得花容失色。

「對唔住呀，我頭先咁惡話你，唔好嬲啦。」

「同埋呢，我...我想講...好...好多謝你...」

「傻仔...無端端多謝啲咩啲？」

「自從識左你之後，我個人大膽左好多，終於搵到自己嘅目標，係你令我搵返團火，多謝你啊！」

「頂你，講埋啲咁嘅野！我都無做過啲咩...」

「我地唔係識左好耐，但係唔知點解你求其一句說話，我都好在意，好想做到比你睇，我諗我真係...鐘...鐘意左...你！」

「衰人，唔知同其他女仔都係唔係咁講嘅！」她輕輕鬆開我的手。

「無啊，just for you！」

「聽住先，行啦。」Chloe站起來，轉身走。

「我當你應承㗎喇！」

「咩呀，我咩都聽唔到啲，bye！」

「唔好走啦，做我女朋友好無？」我急步走前，從後環腰緊緊攬着她。

「你做到我嘅要求就係咁易考慮下。」她冷冷說道。

「係咩呀，為左你我一定做到架！」

「咁你下場比賽入5球3分波。」

「下，你當我Curry咩，邊有可能呀，2球算啦不如？」

「話知你，做唔到就算囉，放手呀，唔係我嗌非禮架！」

「要嗌你一早嗌左啦，明明就鐘意人係都唔認。」我輕輕彈了她的額頭一下。

「鬼會鍾意你個傻仔！」Chloe反了一下白眼。

接著我們一直打打鬧鬧，和一般戀人無異，不過我始終想Chloe能應允我，讓我名正言順的做她的男朋友。

為了你，我願意奮力一博。

第十九章

第二天一覺醒來，我忽發奇想要給Chloe一個驚喜，別無所求，只為博伊人一笑。

準備妥當後，我就起程去接她下班。等了約十分鐘，Chloe走了出來，我向她揮手，但她卻沒為意，急步在我面前走過。

這時我想到個作弄她的計劃，於是打電話給她，只見她看看電話，沒理會便繼續前行。

Chloe是不是氣了我，難道我昨天的行動太急進了嗎？

應該不是這樣，昨天的她看來和平常差不多，她到底發生了甚麼事呢？

我終究放心不下，一路上悄然尾隨，一直到她家樓下，想不到又見到他。

又是他，藍祐天。Chloe看到他後臉色一沉，然後打算轉身離開，誰不知藍祐天拉住她，Chloe使勁掙扎也擺脫不了他。

這種環境下我不出手還算甚麼男人。我一口氣衝了上去，一腳踢向他腰椎，痛得他馬上縮手。

「又黎搞我條女，我打鳩你條仆街！」我連環揮拳，狠狠打在他心口，打到他趴在地上。

「呀風...唔好打啦，你打死佢㗎喇。」Chloe拉住我。

「求你放...放過我我以...後...都唔...敢啦」藍祐天急忙爬起來跑走。

「好多謝你救左我，好彩有你咋，你唔係度我都唔知點算。」Chloe雙眼通紅。

「而家無事啦，我話過要保護你嘛。」我摸摸她的頭。

「係呢，你上唔上黎坐下？」

「好啊。」我心裏一沉，難道這麼快就要見家長？

「做乜呆晒咁，入黎啦，我屋企人無咁早返。」

「哈哈...無嘢啊。」我坐在沙發上，Chloe遞了杯茶給我，然後坐在我旁邊。

「你又會無啦啦過黎嘅？」她雙眼發光似的盯着我，我真的招架不住。

「無...其實...我...都係無野啦...」我緊張到忘記了原本的計劃。

「唔講就算！」她站起來打算走開。

我立刻拉住Chloe，她失去平衡，倒在我胸前。

「啊！想點啲？」

「想你報答我。」

「點報...」我輕輕吻下去，封住她的嘴。

她本來想推開我，但被我緊緊抱住，還是放棄了掙扎。

因為是第一次接吻的關係，我沒有伸脰，只是唇貼唇，她嘴唇柔軟的觸感已經使我欲罷不能，吻了差不多一分鐘才停下來。

「搞錯呀，無問過人就錫落黎。」Chloe含羞答答地低語，臉上泛紅的酒窩比接吻時更明顯。

「吓，我都無怪你就咁就擺左我個初吻，仲有你都好enjoy咩，扮咩啲！」

「死人陳澤風，又蝦我！」

「唔好嬲啦，最多我俾你錫番。」

「唔要呀，變態佬！」Chloe打了幾下我的手臂。

「你遲早都係我嘅人，怕咩啫。」我撞撞她的肩膀。

「你做到上次講嘅野先算啦，走啊你！」她推我出門口。

「你差咁啲野未做啲。」我指指自己的面頰。

「唔知醜，瞇埋眼先。」說完她便彈了我額角一下。

「邊有得咁啲！」

「鬼叫你成日蝦我呀！」Chloe弄了個鬼臉，隨即把門關上。

雖然她一次又一次氣弄我，但我心頭了無一絲恨意。

無論她如何打我鬧我，心裏總洋溢着甜絲絲的感覺，剛才從接吻開始，心跳一直砰砰的跳，難以平復下來，似乎說明着我是真的愛上了她。

越是難得到的，我偏要得到，你別囂張！

第二十章

處理完兒女私情後，我全心全意投入訓練，Lue Sir也驚嘆為何我整個人脫胎換骨似的。

「你痴左咩線，成個人唔同晒，爽左咁多，應射則射，應傳則傳，開左竅呀你？」

「你上次提左我，我有認真諗過，唔好太癡波，格硬死爆爛爆，我返到去睇下啲分析片，自己再落場試練下，搞搞下好似打好左，哈哈！」

「過幾日有場波要打啦，你keep到呢個水準，我俾你打正選！」

「我會比心機㗎喇。」

經過上次的慘痛經歷，我決定改進自身的打法，多作無球走位、接球投籃，掩藏弱項如持球突破和低位單打。

我還練成一招新技能：Westbrook的僵屍跳投，當然沒他跳得那麼僵硬，那麼快，不過應該可以一戰。

我和呀文的配搭也日漸純熟，他廣闊的球場視野加上我獨到的走位令進攻更立體，也替跳投不穩的他製造更多突破空間。

中途休息時，我和呀文閒聊。

「下場有無信心啊？」呀文問我。

「Ok嘅，唔知叫唔叫Chloe黎睇好？」

「有女朋友撐場，你條友爽撚死啦！」

「都未係，佢話我要入5球3分先應承我㗎。」

「你同我定，我實猛咁做波比你！」呀文拍拍心口。

「你真是我的好兄弟！」我用古天樂腔的普通話說。

「兄弟做一世，幾時都撐你架啦，你屌鳩呀Nick都係咁話。」

「屌！連你都知，今次死硬啦！」

「無事嘅，有條友得罪左全世界，邊得閒搞你吖。」

「咁都好啲。」我倒抽了一口涼氣。

「又估唔到你咁夠薑屌佢。」

「不鏟都唔妥條狗公㗎啦，仲要想同我爭女，仲唔屌佢！而家都無幾何見到，我仲會怕佢！」

「做乜最近見親你都咁有火。」

「唉...人大左，諗諗下唔想咁樣成世睇人面色做人，做返自己仲開心。」

「你都啱嘅，唔趁而家後生任性下仲等幾時。」於是我就決定了叫Chloe來看我比賽。

「好野，有得睇你出醜，好期待呀！」

「搞錯呀，連你都想我衰！」

「咁我唔想你條柒頭做我條仔呀嘛。」

「邊到你唔想，我實做到架！」

「睇下點！」

正式比賽的日子終於來臨，這一戰將會影響我未來的人生，我絕不能輸！

第二十一章

已經很久沒打過這種正式比賽，上次恐怕要數到七八年前，和上次一樣的是我依然是打得分後衛，不同的是失去了以前那種捨我其誰、傲視群雄的氣燄。

畢竟現階段的我很難再倚靠身體對抗性大打霸凌籃球，當年那一次的受傷讓我對碰撞避忌，加上這種打法亦對膝蓋造成不可磨滅的勞損，相信轉向技術流是明智之舉。

「好啦，今場正選就咁 PG 呀添 SG 肥仔 SF 呀文 PF 輝仔 C Tower，打法照舊，呀文你一開波帶動大家，製造機會比對友出手，射手盡量利用無球掩護出手，中鋒roll in跟進，唔work就做錯位比呀文iso，係咁多！」Lue Sir在開賽前跟大家稍作指點。

「喂，唔使湊喎，對面唔算好勁。」呀文拍拍我的肩膀。

「咁耐無打比賽始終唔係好慣。」我環顧四周，也看不見Chloe的蹤影。

「又話黎睇我，仲未見人。」我喃喃自語。

「喂柒頭，專心啲啦！」Chloe不知從那裏竄出來，在背後打我的頭。

「屌，痛呀！」我裝模作樣。

「你唔好累街坊啊！」

「唔同你講，開波啦。」

比賽正式開始，對方跳球jump贏，0號帶着球來到我面前，連續幾下胯下運球，再加速突破，誰不知他突然拔起出手，我完全反應不切，收煞不及，輕鬆穿針2分得手。

「好難守架，條友以前打開學界，係D2起晒朵。」呀添安慰我。

呀文馬上策動攻勢，交給高位的Tower，再來個give and goal，找到跑空的輝仔，在籃底晃起對手，再放籃得分。

接着幾個回合，0號仔頻頻結合純熟的控球以及過人的爆發力突破我和呀添的外圍防守，逼不得已要採用包夾戰術，才稍微減弱他的威脅，但代價就是總有一個人在弱邊被放空，幸好對方錯失了幾球大空檔，比數一直維持着一兩分的差距。

對方也開始針對性盯防呀文，寧後退兩步放他投籃，也不給他突破的空間，就算他過了第一重防守，還要面對弱邊的協防，切斷和我們的連繫，逼他硬幹，很難像剛開賽時連番的直搗黃龍，一個突破分球就打穿防線。

於是我們多打手遞手，借內線的掩護出手，或者利用擋拆打一些簡單的pop out戰術。

開火權逐漸落在呀添和我身上，可惜的是我手感頗為冰冷，連續幾球都偏離不少，越投不進就越急躁，結果作了不少不合理的投籃，久而久之失去信心，打得很猶豫，拖慢進攻節奏，甚至有兩三次嚴重失誤，僅靠罰球進帳1分。

有一球我打算使出拜佛過人，誰不知成功ankle break，不是對手，是自己，仆倒在地，還輸了個快攻。

Lue

Sir終於忍無可忍，馬上把我換下，兇狠的眼神好像要殺了我一樣。看台上的Chloe搖搖頭，原先熱烈的打氣聲逐漸化為靜默，雙眸也不再靈動，取而代之是淡淡的失落。

看來我還是辦不到你的要求，對不起，我讓你失望了。

第二十二章

坐下來後，我不停地想為何打得如此不堪入目，越想投進就偏離越多，手感每況愈下，連帶控傳也做得不好，屢屢成為進攻終結者，防守也喪失了剛開賽時的energy。

到底我在搞甚麼鬼啊？是不是我太在意要得分，被焦躁影響了節奏，我自己也不清楚。

到底我是不是打藍球的材料，我壓根懷疑這次重新打比賽的決定。

「發夠夢未啊！」Lue Sir如雷貫耳的吼叫把我拉回現實。

「你今日搞乜撚啊，你當自己丁尺，成場係度遊魂，一擺波就鳩射鳩扭，上次嘅你去左邊？跟返你平時個節奏去打就得，果斷啲打，射唔入都唔好怯，

有無聽過天地豪情入面個大頭文一句話「咩都可以輸 信心就唔可以輸」信自己，無野係無可能，舊年playoffs Jamal

Murray打馬刺上半場一分都擺唔到，下半場打到上晒身咁，有信心唔一定得，但無就一定唔得！」

「多謝你，我知點做㗎喇。」他的一番話讓我恍然大悟。

半場休息時，呀文走過來拍拍我。

「放鬆啲打，要對自己有信心，保持返個侵略性。」

「嗯，我掛住show off比佢睇，搞到focus唔到，sorry呀，累左隊波。」

「唔緊要㗎，輸緊5分啫，我地努力啲實追到。」輝仔也走到我面前說。

「你打我一拳吖，大力啲打！」我指着胸膛對輝仔說。

「啊！！！」我又再次燃燒起來。

下半場打了三分鐘，Lue Sir換我接替呀添上場。

「上啊肥仔，唔好衰比條女睇。」Lue Sir在我耳邊說。

我跟他打了個眼色，就回到場上。

剛上場的幾個回合，我都專注做好髒活，設掩護、補防以至卡位搶板。適應了比賽節奏後，我馬上用一記進球宣布回歸。

呀文跟Tower打擋拆，Tower roll

in接球，殺進籃底，對方立馬協防，他瞧見底角的我無人看守，把球傳過來，

我接球後屏息靜氣，全神貫注，聳聳肩，虛晃一槍避過撲防補位的球員，帶橫一步出手，球在長空劃出一記完美的拋物線，3分穿針。

場邊的隊友傳來一陣驚嘆，我也向Chloe舉手指公示意答謝。

進了第一球後，我開始恢復信心，繼續一貫的跑動拉扯對方的防線，接連投進幾球catch and shoot，對方漸漸忌諱我的外線威脅，不敢過於協防籃底，以致輝仔和呀文的切入造成一連串腥風血雨。

對面的0號仔面對着我們的擋拆陷阱和逼邊逼底戰術，身手再好也有點招架不住，畢竟隊友的級數和他有明顯的落差，進攻的把握力頗為遜色，結果陷入無止境的單打獨鬥。

球賽在第四節最後2分鐘已進入垃圾時間，我們拉開了雙位數的差距，雙方開始換走主力，正選只餘下我在場上，皆因我尚未完成任務。

這刻的我已經殺紅了眼，祭出僵屍急停，把對面打得懷疑人生，但一切為時已晚，任我再努力，也做不到她的要求，終場我只取得15分 (2球3分)。

鳴笛一刻，我全身精力耗盡，累得直接躺在地上，現在只想好好睡一覺，其他事就由它吧。

第二十三章

朦朧間我隱約看到一隻手伸過來，我下意識遞手，讓那個人拉起我。

「無事啊嘛，你面色唔係幾好啲。」女孩把臉哄過來。

「無咩，你係...」

「下，你唔認得我呀，我係呀文個妹小柔，我地之前見過㗎喇。」她對我笑了笑。

這時我才回過神，看着眼前這張臉，談不上熟悉，也談不上陌生，好像不知在那裏見過。

「做...做咩...眼甘甘望住人...」小柔面頰忽爾變得泛紅。

她算不上甚麼國色天香，相貌平平，還矮我大半個頭，不過她的笑容有種不能抗拒的魔力，很有親切感，很溫暖。

「無，望真啲，你同呀文又幾似樣。」

「哈哈，兩兄妹點會唔似，係呢你頭先係場上真係幾型，射波又靚又準。」

「你咪玩我啦，好彩㗎嗰，上半場射極都唔入，你呀哥勁我好多啦！」

「算吧啦佢，淨係識屈速，點都係你勁啲！」

「講呢啲！」我耍手擰頭。

「你肚唔肚餓啊，一齊食啦不如。」小柔興奮地捉住我的手臂。

「一齊...」

「你諗左去邊，我地成班人一齊食啊！」

「哦，原來係咁。」

「死！我唔記得有野要做添！」我現在才醒覺自己忘記了一件很重要的事。

我環顧場館也找不到Chloe，到底她去了哪裏。

「Sorry，我要走先，下次再食過。」我說完便9秒9跑出去。

原來Chloe站在場館門口，她一看到我就轉身急步走，我立刻追上去。

「韓小姐，等埋我啊。」

「你過黎做咩，唔使陪人地啊陳生！」Chloe西口西面。

「佢係我隊友個妹，我同佢無野架，冤枉啊！」

「無野又掂手又笑得咁開心？」

「你呷醋呀？」

「邊有呀！關我咩事喎！」

「咁佢伸手無理由唔俾佢拉咩嘛，出於禮貌啫。」

「真係嘅？」

「梗係啦，我心入面剩係得你一個喳。」

「又口花花。」

「下次我唔會理佢啱喇，靚女唔好嬲啦。」我搥了一下她的臉。

「今次算你啦。」

「咁係咪做唔到都算啊？」

「睇你有無誠意囉。」

「跟我黎啦！」我拖着Chloe的手跑往遠方。

「喂，去邊啊？」

「一陣你就知。」

第二十四章

「做咩帶我返黎樂天？」Chloe流露出一個非常詭異的表情。

「唔話你知。」

「古古怪怪。」

「大佬，我走先啦。」Save哥看到我們後，一手把鎖匙拋給我。

「小心搞出人命。」他臨走前在我耳邊說，靜靜塞個dom進我褲袋。

「你真係...」我苦笑一下。

「你地頭先講咩呀？無晒人你想點？」Chloe完全搞不清楚狀況。

「你話呢？」我用心邪的眼神盯着她。

「你唔好亂黎啎！」Chloe雙手護胸。

「我咁正直又點會做埋啲咁嘅野呢。」

「過黎吖，有野俾你睇。」我指指房門。

「唔制！」Chloe扁扁嘴，別過臉。

「唔係啲咩衰野，黎啦，瞇埋眼先。」

「信你一次咁多。」

我扶着Chloe進房，讓她在鋼琴邊坐下。

「開得眼未呀？」

「你係心入面數十秒就開眼啦。」

我吸一吸氣，手指輕敲琴鍵，旋律響起。

誰會為愛人 不惜一切

而我或太傻 愛你願放棄一切

朋友亦叫我控制

說放膽愛便失勢

我不想給歪理來蒙蔽

容我愛你深不見底

I Miss You 感動你

這份愛 太神奇

真心來溶化你

誰要勉強假裝愛理不理

我只想 保護你

發誓要 你歡喜

不必刻意 無需構思

坦率對著你說一句 I Miss You

Baby I Miss You

這次是我第一次當着別人面前自彈自唱，每一個字，每一個音符都代表着我對她的心意，我無時無刻都想見到眼前的這個女孩，擁着她，親親她，很想好好愛護她，

只要她開心我便會開心。為了她，我不惜一切代價也要讓她得到幸福，永遠在身邊支持她，疼愛她。

音樂停下的一刻，我們四目交投，清晰看見幾滴淚珠凝在她眼眶裏打轉。

「衰人，又搞到人地咁樣。」

「唔好喊啦，我做呢啲都係想你笑，想你開心。」我輕扶着她的臉。

「我...知架，但我控...制唔...到，你為我...做咁多野...我...真係好...開心！」Chloe把頭靠在我的胸膛。

「傻妹。」我順勢把她擁進懷裏。

「雖然我地識左唔係好耐，經歷嘅事又唔算多，但係唔知點解你偏偏俾到感覺我，好想保護你，好想錫住你，想你一直對住我笑，你可唔可以俾個機會我好好咁愛你，應承做我女朋友，好無？」我稍稍鬆開她。

Chloe點了幾下頭，然後輕輕吻我的臉。

「真係得？真係得？」我捉住她的雙手問她。

「係啊，白痴。」

「好野！」我輕吻了她的額頭，然後滿足地傻笑。

Yeah！我終於成功了！

第二十五章

這一天是我有記憶以來最開心的一天，不論問多少遍，我的答案都是一樣。

每步走來，縱稱不上艱險萬分，但一步一驚心，能夠與她攜手同行並非易事。

每當想到可以和這個女孩一起，要我做任何事都是值得的。

「Chloe BB，我好掛住你呀，好想而家見到你。」我徹夜難眠，一時興起打電話給她。

「今日我地先一齊咋喎，有無咁癡纏呀？」

「鬼叫我女朋友咁正咩！」

「都唔知係唔係真。」

「掛你掛到馴唔着，點算好？」我向Chloe撒嬌。

「乖啦，聽日一齊行街咪見到囉。」Chloe溫柔地低語。

「好啦，錫啖先。」

「Mua」

「Mua」

就這樣我們正式展開拍拖生活，做盡逛街吃飯看戲等情侶常做的事，我的世界有了她，終究不再是孤身一人。

簡單一個對望、擁抱、接吻都滿滿盛載着幸福的味道，真實得來卻帶點夢幻，難道這就是戀愛的感覺嗎？

她為他的生命重新添上色彩，使他不再感到寂寥，不必以鍾愛獨行為名，強裝瀟灑，獨來獨往，活在自己的世界裏。

唯獨是她，喚醒了那個埋藏在心深處的陳澤風，助他修補那曾經跌得滿目瘡痍，名為初心的碎片，讓他不再抗拒踏足外界，坦蕩蕩的向他人展露心聲，做回那個以往敢愛敢恨的自己。

然而那記傷痕尚未磨滅，只是此時歡愉的時光蒙蔽了他的心眼，並未瞭然傷口到底有多痛。

「喂，有啲野想你幫下手。」我一大早接到呀文的來電。

「咩事啊？要人幫就咪攞搵我啦。」我冷冷說道。

「得你幫到我咋，我個妹病左，拍硬檔買啲發燒藥同碗粥上我屋企吖。」

「你食自己啦。」

「我唔得閒啊，老豆老母又返緊工，好小事啫，求下你啦皮爺！」

「見係你咋，下次請食飯啊。」

「得...得...得」

我也不知道為何要幫他的忙，換作是以前，我根本不會自找麻煩，絕不幹這種吃力不討好的事，

或許是因為那些經歷讓我明瞭到任你如何真摯待人，對方亦不一定予以同等的回饋，甚至認為是理所當然，既然如此又何苦毫無保留的傾注感情，使自己受傷。

也許是因為Chloe的關係，我一步步的重新開始相信真心，不再過度盤算付出和回報是否成正比。

真心始終會感化他人的心，總有人能感應得到，那怕只得那一個人有着共鳴。

第二十六章

我準備妥當就趕過去呀文的家。

「等陣。」我按下門鈴，隱約聽見小柔虛弱的聲音。

「Hi，我帶左啲野上黎，你無乜事吖嘛？」

「少少啦...點...點解...風哥哥你會黎嘅？」

「仲好講，你大佬囉，逼鳩我黎！」

「唔好意思，阻到你。」小柔有點難為情。

「好小事啫，食左野先講啦。」

「唔，碗粥好好味呀。」她津津有味的吃着我弄的皮蛋瘦肉粥。

「梗係好食啦，我整㗎嘛。」我戚戚眉。

「你好叻啊！但係點解你對我咁好嘅？」

「Ok啦，還掂煮開咪順便煮埋你個份囉。」我擦擦鼻尖。

「食完個人好似精神左啲。」

「食埋藥抖下啦，你好返啲咁我走先喇。」

「唔好啦，我唔想你走。」小柔拉住我。

「吓？」

「好悶啊，你可唔可以陪多我一陣？」

「Er...唔係咁好嘅。」

「你唔係咁樣對個病人吖嘛？」她扁扁嘴。

「咁好啦。」

「不如一齊睇戲，我係Netflix down左套50 first dates，你睇唔睇啊？」

「病人大晒，你話事啦。」

「好野！」

看了約半小時後，不知是不是藥力發作的緣故，小柔靠在我肩膀睡着了，睡得很甜。

在陽光照耀下，臉蛋更顯粉嫩，仔細一看才留意到她的相容也蠻娟好，使我情不自禁下一寸寸的靠近她。

當我想吻下去時，手機突如其來的震動打消了我的邪念，我這時才憶起一會約了Chloe，於是就輕輕挪開她的頭，替她披上我的襯衫，然後就靜悄悄的離開。

到底我在搞甚麼，我已經有了Chloe，絕對不能幹這種事的。

第二十七章

比賽經已步入白熱化階段，淘汰賽接下來就要展開，我們都不敢鬆懈，努力備戰。

「兄弟，聽講下場對手好撻勁，有個叫咩清水灣道KD，成米9高，打乜位都mismatch，場場20+，大檸樂啦。」呀添跟我們說。

「好似話係今次籃兒當自強邀請賽Top 3選手，仲有幾個球探黎睇佢打波。」輝仔找到一份報道。

「咁我地下場點打？」呀添問道。

「理撻得佢啫，打返我地家波得啦。」Lue Sir神不知鬼不覺地走過來。

「呀Sir有無咩要我地練？」我問Lue Sir。

「唔使，其實知唔知點解我好少要你地練基本功同啲技巧野？」

我們全部人搖頭。

「我就係唔想你地練死呢啲招，打波係要變化，唔好俾招式規範左打法，老實講打開波都識呢啲技巧，但係有幾多人可以做到融會貫通，有陣時你自己摸下摸下又可能創到新招，好似Olajuwon將踢波嘅技巧用落籃球，咁就俾佢整到個夢幻步。招式唔一定要跟人，可以自己創造出黎，個個都一樣咁打，又有咩意思？好似呀肥仔望落亂咁黎但又俾佢打到，所以我放手由你地自己打，明唔明？」

枉我以前一直質疑他的執教功力，平常都在場邊玩電話、看股票，甚至在比賽時叫暫停問我們點甚麼外賣，直至現在才明白Lue Sir的用心良苦，思維更勝一眾NBA的名教練。

練了一會，我彎着身軀在場邊稍作歇息。突然間有一隻纖細的手把水遞到我面前，我滿心歡喜地抬頭一看，怎料看見的竟是她。

「你...做咩係...係度嘅？」我先是愣住，然後接過瓶子。

「點解我唔可以係度？」小柔皺皺眉。

「無話唔得，不過未係比賽啲。」

「咁我想睇你地練波，順便有啲野要俾返你咁嘛。」她從背包裏拿出一件襯衣。

「唔使咁急俾返我，又唔係咩緊要野。」

「要嘅要嘅，同埋上次好多謝你煮粥俾我，陪我睇戲，又幫我冚返件衫。」

「唔使客...」話口未完，我感覺到面上有東西貼了過來。

小柔踮腳，輕輕吻了我的臉頰，然後含羞答答地低着頭。

「你...」我目瞪口呆，聲線也有點顫抖。

「好衰㗎，唔係要人講出口呀嘛！」

有個人把這一切看進眼內。

第二十八章

怎麼Chloe也在這裏，我是不是眼花了？

不，我揉揉眼，眼前的景象沒有絲毫變化，依然是她，但又仿佛不是她。

這刻的Chloe看來很陌生，從未見過她那空洞的眼神和落魄的神情，靈魂像是被攝去一樣，只剩餘黯淡無光的軀殼。

Chloe先是凝望住我，雙手微微顫抖着，然後頭也不回的跑掉。

「喂，你做咩唔講野啊？」小柔在我面前揚揚手。

我怔一怔，沒有回應她。

「我係咪嚇親你，你面都青埋。」

「唔...唔...係...」

「你唔使咁快答我，我俾啲時間你諗吓。」她嫣然一笑，用手指封住我的嘴唇。

我還是沒有反應。

「我等你呀。」她在我耳邊輕聲細語，接着便離開了。

我久久未回過神來，呆站在原地，直至呀文走過來搭着我的肩膀。

「醒未啊，拿拿臨追返條女啦，我呀妹嗰度我會搞掂㗎喇。」

「你信我無...咩...？」

「你有病呀，咁你都哽得落。」

「我對佢無野㗎。」

「知啦知啦，行啦！」呀文推着我走。

Lue Sir也示意我可以先走。

我跑出街上，四處張望，也看不見Chloe的蹤影，只好到處碰碰，最後在附近的公園找到她，看到她抱頭痛哭的樣子真讓我很心痛。

「Chloe，唔係你諗咁樣。」我慢慢走上前。

「你走呀，我唔聽呀，我唔聽呀！」Chloe掩着面嚎叫。

「真係無野嚟我地，我對佢無意思㗎，佢要咁做我都控制唔到。」

「咁點解...佢會錫你，你地咩關係啊！」

「無啊無啊，我都唔知點解佢會鍾意我㗎。」

「你肯定做左啲野，唔係佢又點會鍾意你啊，你到底...有無愛過我㗎？」

「我梗係愛你啦，我都估唔到會搞成咁，我...」我捉住Chloe的手。

「你講呀！你做咩搞到漏左件衫係佢度！」Chloe一把鬆開我的手。

「上次佢病左，呀文叫我上去睇住佢。」

「做乜你唔同我講呀？係咪做左虧心事呀？」Chloe的語氣越來越重。

「我諗住好小事啫，點知佢會...」

「你地係咪搞啲咩野呀？」

「無啊，我剩係擺野俾佢食同陪左佢一陣，之後見佢瞓着咪幫佢冚件衫。」

「係咁多？」

「係呀，你信我吖。」我輕輕擁着她。

「剩係得你講，我點知係咪真㗎。」她推開了我。

「我剩係鍾意你一個㗎咋，從來都係，我下次會同佢講清楚。」

Chloe沒回應我。

「咁你係咪唔聽啦？」

「仲好聽㗎，你瞓住我咁多野！」Chloe加快腳步走。

「BB，我以後唔會㗎喇，原諒我啦！」

「唔！得！」

Chloe登上巴士，我打算跟上去。

「唔好跟住黎，以後唔睬你㗎。」

我只好止步，目送她離開。

到底我該做些甚麼才能得到她的原諒呢？

第二十九章

自從那一天後，我用盡任何辦法也找不到Chloe，由電話、IG，後來到樂天，上班的地方甚至在她的住宅外等足一整天，但這一切盡是徒勞無功。

既然她有心要躲我，就沒那麼容易就找到她，看來只好等她消氣再說。

過了僅僅數天，她就像徹底在我的生命裏消失，世界又再次遺下我一人。

這幾天，我重覆思索為何把事情弄得如此不堪，怪責自己竟然沒注意到小柔的心思，讓她投懷送抱，甚至曾經萌生出一絲歪念，最終傷透了Chloe的心。

本來那一絲自覺能挽回感情的自信也逐漸磨滅，思緒越發凌亂，是不是所有事情已到了無法挽救的地步，一切早已定局？我搖搖頭，對天苦笑，如同三年前的情景。

那怕開首不同，結局亦早已編好，身邊人終究會離開，到頭來注定是孤獨一人，恐怕萬年孤寂就是我的命運，是無法扭轉的定理。

軟弱的我萌生起放棄的念頭，但偏偏有一個人硬是要將我從黑暗裏拉出來。

「一日未分手啫係仲有得救啦，咁快就放棄，你甘心咩？」Save哥來找我。

「你唔會明，一次又一次係咁，整定我係要屈服㗎喇。」

「就算呢個世界不停要你放棄，咁又點，你就要認命咩，打唔贏個世界都好，你都唔可以俾佢打低！」Save哥扯着我的衣領。

「我唔係無試過，我已經好努力啦，但係都改變唔到，呢個係命運。」

「人定勝天呀屌你，只要你肯堅持，總有一日你會改變到！」

「得咩？」

「唔知㗎，希望在明天吖嘛。」

「屌，又係呢句。」

「我一直都信會光復到香港，十年唔得咪廿年，廿年唔得咪三廿年，總有一日會實現到㗎。」

「望就咁望啦。」

「比起呢啲，氹女仔好小事啫，我覺得佢只係對自己無信心，驚你玩厭左，你同佢講返你心入面係點諗，佢feel到你係真心鍾意佢，佢就應該會原諒你。」

「我知㗎喇，我唔應該咁易就放棄呢段感情，大佬多謝你鬧醒我。」

「講呢啲，一場兄弟唔通睇住你死咩！」

謝謝你為身處深淵的我帶來曙光，這一次我絕不會放手。

第三十章

「我有啲好緊要嘅嘢同你講」我WhatsApp 給Chloe。

「嗯」她終於回覆了我。

「咁一陣係你屋企樓下等」

「好」

好了，Chloe終於肯見我。這次我抱着破釜沉舟的決心，坦率的面對她，若果她真的不原諒我，那麼我只好瀟灑地離去，不再糾纏。

Chloe沒有爽約。她依然是那麼美麗動人，但失去了往日的神采飛揚，取代的是一臉神色黯然，似乎我真的傷得她很深。

「我有野想同你講。」我們同時說出口。

「你講先。」Chloe低頭說道。

「我對佢真係無野嘍，我已經同佢講清楚，唔信你聽下。」

「Sorry呀風哥哥，我唔知你有女朋友，我仲做啲咁嘅野，搞到你地關係差左，我真係好對唔住你地呀。」我讓Chloe聽一下小柔給我的voice message。

「Chloe，你信我吖。」我握住Chloe的手。

「嗚...嗚...」Chloe默默的流淚。

「唔好喊啦，今次係我處理得唔好，搞到佢誤會左，以後有咩事我都會同你講，你原諒我啦好無？」我輕撫她的臉蛋。

「對...唔住啊...我竟然唔信你，仲嬲左你咁耐...」

「我無野嗶，你嬲都好正常啫，唔好擺係心度。」

「其實...我知你...好錫我，但唔知點解見到你同個女仔咁親密，我就好嬲，好介意，可能因為我之前嗰ex...佢」Chloe說着說着哭得更厲害。

「你放心，我唔會好似佢咁，我以後會做好啲，俾到安全感你。」

「我好驚你唔再愛我，始終我唔係一個溫柔體貼嘅女仔，性格又差，我係咪唔配做你女朋友啊？」

「我唔准你咁諗，你肯做我女朋友係我嘅福氣，你已經好好㗎喇，係我要做好的先真。」接着我從褲袋裏拿出兩條手繩。

「點解...」

「上次行街見你眼甘甘望住，咪靜靜雞買左，無辦法啦，我搞到我女朋友唔開心，緊係要補償返啦。」我提起Chloe的手替她帶起。

「呀風...多謝你。」她止住淚水。

「傻妹。」

「咁你係咪唔嬲啦？」我續說道。

「嗯，今次就原諒你啦，咁你係咪應該有啲表示呢？」

「mua...」我朝她的櫻桃小嘴吻下去，雖然嚐到一點眼淚，但我卻感覺不到苦澀的味道。

Chloe終於露出久違的笑容，跟最初的她一樣，很甜，很美。

「開心返就好喇，我幾驚你以後都唔理我。」

「係㗎，鬼叫你成日蝦我。」

「邊有啊，好似係你成日笑我咋喎。」我搔搔她的腰肢。

「哈...哈...好痕呀...呀...」

「你睇，又笑我喇。」

「停呀...我...投降...啦...」

「好，今次放過你啦。」

「你仲記唔記得上次嘅約定？」

「記得，但你最後都做唔到。」

「今次我應承你，雖然對手好勁，但下場我一定會贏俾你睇。」

第三十一章

「唔好諗咁多，落場同佢死過！」呀添啪啪手腕。

我還在反覆思索剛才Lue Sir跟我講的一句話。

「KD交俾你守。」

幹！他足足高我六寸，根本沒可能干擾到他的出手，站着投籃也可以，Lue Sir是不是有病，他嗎的真把我當是Patrick Beverley，我不是瘋狗囉好不好。

「嘿嘿，DPOY，靠你啦。」呀文對着我奸笑。

「你守返啦，咪撚玩我！」

「緊係交俾我地嘅王牌~風哥啦...wu~wu~」呀文還未說完，其他隊友已經紛紛起哄。

在這種境況下，我也沒有後退的餘地，唯有硬着頭皮上。

「天將降大任於斯人也，必先苦其心志，勞其筋骨...」我重複地默念以放鬆一下心情。

陳澤風，你做得到的！

一踏足場地就感受到那種強烈的壓迫感，幾乎全場都是對方的粉絲，吶喊聲連綿不斷，胸口好像被一拳接一拳的高打，莫說站立，就連呼吸也有點困難，後來的我才明瞭到這就是所謂的主場威力。

「Kelvin~Kelvin...」

「高偉瑞...啪啪...高偉瑞...啪啪...」

現場的尖叫聲此起彼落，不知道的還以為是甚麼大明星，原來就是那個男人 - 清水灣道KD。

乍看之下，這個人有點全盛Fisherman Lok的味道，氣宇軒昂，昂首闊步，舉手投足都散發着刺眼的光芒，美中不足的是留了個典型的MK

頭，要不是當個模特兒也行。

「咁多女女打氣，我都想要啊！」輝仔展現出艷羨的眼光。

「FF啦你，你夠人地咁型咩！」我推了輝仔一下。

「而家嘅我話晒都型過陳冠希啦屌！」

「樣衰過佢你真係食得屎咯。」呀添笑說。

面對着高偉瑞，我真的有點膽怯，單憑氣勢已感覺到絕不好對付，實力遠遠在我之上。

此刻的我不由自主的打起退縮的念頭，但看見她熱切盼望的眼神，心裏的疑惑全然化空，馬上抖擻精神，調整好心情，準備和他決一死戰。

第三十二章

開賽初段，雙方尚未入局，連續幾個回合都無功而回，過了分半鐘仍是掛蛋。

呀文拿下防守籃板後，推進過半場，左手舉起無名指和尾指，示意打個double drag screen的戰術。

輝仔和Tower在牛角位附近設立掩護，我從底角跑出來現身接球，跟防的球員被Tower擋走，我隨即把握一瞬的空檔投籃，2分得手，先下一城。

落後2分後，對方開始發動反擊。之前幾次攻勢，對方的戰術都走不出空檔，於是直接把球交給高偉瑞。他在肘區拿球單打，一下刺探步便拔起來跳投，我跳盡也無法干擾，擦板得手，把比數追平。

接下來他們好像有點看透了我們的打法，祭出無限換防來針對球的轉移，寧願錯位，也堅持不包夾。

在這種情況下，隊友很難跑出空位，更多時候被迫由呀文和我來單打，但面對着幾個兼具高度和機動性的側翼，得分變得相當艱難，只有在對方控衛身上才拿到一點甜頭。

至於高偉瑞，他一找到節奏便勢如破竹的連番得分。與身材不符的協調性，結合柔順的投籃手感和不俗的運球技術，讓他完美演繹出KD的打法。

我完全擋不住他，有幾球沒有失位也被他顏射得手，畢竟身高有著懸殊的差距，伸盡雙手也影響不了他的出手。

有幾次換防到輝仔和Tower身上，KD更是把他們羞辱一番，簡單一個變向就晃開，貼上去被過爆，不貼又直接出手，怎樣守也不行。

恐怖的是對面還有另一個單打好手，好像叫甚麼開源道Walker，變幻莫測的控球技術加上刁鑽的切入，使我們顧此失彼，很難集中盯守其中一人。

他倆不是只有自行得分，更會運用自身強大的吸怪能力來帶動隊友，當我們想全力堵截KD或Walker，他們就分球給外圍的一票射手，毫不留情的開火。

對方雙星完全把文風喪膽比下去，整隊只有呀文和我零碎地得分，其餘的人都無法創造投籃空間，就

算突破到側翼的防線，還有KD極大範圍的掃蕩，形成一層層堅固的防禦。

有一次我使出遲疑步，連續兩次作勢反方向轉身，把對手過掉，直衝籃底，

正當我以為能輕鬆上籃，誰不知KD迅速由弱邊補位，從後一下子扣掉我的上籃，嚇到我目瞪口呆。

半場結束，我們以28-44落後，KD和Walker分別貢獻18分和13分，而呀文和我就聯手取得19分。

第三十三章

中場休息時，我們幾個圍圈商討下半場打法。

「再咁落去真係唔掂，我地啲戰術完全做唔到，淨係得呀文同呀風擺到分。」Tower垂頭喪氣地說。

「實力相差太遠喇，點打啊！」呀添氣憤得大力拍椅。

「如果佢係度就好啦。」Tower又說。

「無可能，佢點會黎到。」呀文搖搖頭。

「係咪講緊我啊？」有把磁性的聲音從後方傳來。

我們紛紛轉身，只見一個高大的身影靠在欄杆。

「龍哥，真係你？」

「我地有救啦！」

「No，call me C Dragon！」那個人搖搖手指。

之前以為高偉瑞稱得上是挺帥氣的，但現在只有C Dragon能配得起這兩個字，單是深邃的眼神和濃厚的眉頭就足以擊倒他。

「Chok夠未呀，李志龍，終於肯返黎喇咩！」Lue Sir沒好氣的說。

「隊波放我一個星期假，咪返黎睇下你地打成點，無左我都打得唔差吖。」

「輸緊十幾分啲。」呀添苦笑。

「大家都打得好努力，防守好專注，係進攻打唔到平時嗰種風格啫。」C Dragon拍拍呀添的肩膀。

「係囉，大家唔好咁灰，仲有下半場俾我地追，仲有龍哥係度使乜驚吖！」呀文拍拍手說道。

「都話係C Dragon咯。」

「知你型棍喇屌！」我們異口同聲地說。

「講返啲正經野，一陣呀龍上場頂呀Tower，輝仔拉上去打Center，多啲打5 - out，清空space俾呀龍係籃底，同埋肥仔你去守返控衛，其他人就車輪戰招呼KD，收唔收到？」

「Yes Sir ! 」

「喂，靚仔你都幾好波嘞，攻守一體，J死女啦。」C Dragon走來跟我說。

「咪玩啦，點夠你勁咩，高大有型，打到去台灣SBL，連OJ Mayo都點名讚你。」

「欸，門面功夫黎啫，一陣靠你carry我喇。」

「哇，唔敢當，唔敢當，靠你幫我吸怪就真。」我身軀微微一躬，雙手如武俠般緊合。

「大家咁話。」

第三十四章

球賽再度展開，我隊先開球。

呀添運球過半場後，馬上塞球給在肘區的C

Dragon，他一拿球便順勢轉身，作一個刺探步，假意投籃，稍稍騙到對方的重心，立即加速往底線切，對方勉強跟上，然後Dragon再轉向中路擺脫掉他，頂着對方中鋒上籃，造成and 1。

下一次進攻，Dragon更是直接拿球單挑高偉瑞，在低位連續使出肩晃，再來個翻身跳投把他吃掉。Dragon一口氣連得5分，形勢瞬間逆轉，不再被他們主導。

對方馬上叫了個暫停，此時我們注意到場邊啦啦隊的談話。

「你識唔識嗰個人，高大靚仔又好波。」

「Kelvin都唔夠佢黎啊！」

「好型啊！」

C Dragon向她們做了個致敬的手勢，換來一陣陣的歡呼聲。

「好癲，人地fans都俾你電暈。」輝仔雙眼裏充滿妒意。

「人地咁支持我，梗係要報答下㗎啦。」C Dragon撥弄一下頭髮。

暫停過後，對方試圖加強攻勢。Walker叫了個檔拆，打算借掩護出手，可惜被我一個橫身貼近，他只好帶球推前，結果進了我和呀文設下的陷阱。

前有埋伏，後有追兵，帶了一整個圈也找不到出手的機會，最後只能扔給KD拆彈，當然是無功而還。

因為我不必再承擔過多的單打，於是多了體力去招呼Walker，他雖然運球出神入化，但速度一般，面對着我的貼身防守，他得費盡九牛二虎之力才能稍微創造出投籃空間，沒再像之前那樣輕描淡寫的取分。

至於高偉瑞，他和C

Dragon根本就是神仙打架，拳來拳往，難分高下。彼此身材條件出眾，機動性十足，進攻手段多變，更具備良好的防守意識。

若要談分別的話，高偉瑞的投籃和變向稍勝一籌，C Dragon的低位腳步和籃框終結則較為紮實。

第三節基本上就是看他倆表演，輪流互爆，比數也沒太大變化，僅收窄了7分差距，追至51 - 60。

第三十五章

此刻雙腳開始不聽使喚，恐怕是上半場消耗過多的體力硬扛KD和大量單打，體力已接近臨界點，很難再維持高能量的打法。

「咁快爆偈呀你！」呀文看我攤在地上便調侃我。

「大佬你試下，又要做ace stopper，又要擺波爆入去，好撻劫啊！」

「平時叫你操fit啲體能又係度hea下hea下。」

「個個好似你咁玩命，練到走火入魔咩！」

「頂埋呢節佢啦，無你外線防守實俾人打爆。」Lue Sir跟我說。

「但我真係頂唔住，俾我抖陣先。」

「咁快就放棄，你唔記得應承左我的咩嚟？」一把溫柔的聲音傳入我耳邊。

「吓，你做咩落左黎？」

「你緊係想我睇唔到你而家咁樣啦！」Chloe大力扭着我的耳朵。

「啊...我無話放棄，只不過成個人真係無晒力咁，之前爆得太盡。」

「我俾啲力量你喇。」她淺淺一笑。

「點俾呀？」

這個時候，Chloe扶住我的臉龐，輕輕親了一下我的嘴唇。

「有無好啲呀？」

「又真係好左啲，可唔可以再黎過？」

「唔得嘞，你贏左先講啦。」她說完便逕自走上看台。

不知何故，全身又充滿力量，我一個蜈蚣彈彈起來，預備繼續作戰。

「你條傻鳩就爽撻死啦，我都想有條女俾力量我啊！」呀文嘟起嘴說。

「妖，你睇到晒呀？」

「咁明顯，全世界都睇到啦。」

「唉，柒左。」

「寸我呢啲毒撻吓話！」呀文握拳，作勢打向我。

「我錯我錯，開波喇唔同你玩。」

第四節終於來臨，對方似乎想拖延時間，放慢節奏，試圖用盡進攻時間。我方當然不會讓他們輕易得逞，立即加強壓迫，逼使他們出現失誤。

比數依舊僵持不下，維持在6至9分之間，於是我們將進攻重心轉移到外線，利用C Dragon在禁區的牽制力，佯攻籃下再分球到外圍。

加上呀文一貫犀利的突破拉散對方的防線，創造了不少中遠投的空檔，我亦不負眾望投進2記3分球，把分差收窄至4分。

倒數90秒，我看穿Walker的傳球線路，快手把球截下，隨即交給輝仔走快攻，上籃搏到犯規，兩罰中一，追至3分。

之後KD和呀文各進一球，時間所餘無幾，只剩下8秒讓我們追回3分差距，Lue Sir要求暫停來制定最後一擊的戰術。

第三十六章

「Last設計個戰術俾肥仔出手，呀文輝仔負責擋人，呀龍穿過掩護走去底角扮接波，肥仔就作勢走上弱邊底角，跟住變速走返出弧頂C&S...」Lue Sir在戰術板上畫來畫去。

「真係...我去射，阿Sir你係咪講笑咋，龍哥文哥啲3分都唔差，不如交俾佢地其中一個啦。」我有點質疑Lue Sir的部署。

「我認真㗎，對面未必估到係你出手，應該唔會重點招呼你，可能殺到個錯手不及，我記得好似94定95年公牛無Jordan，正路應該俾Pippen射絕殺，點知set左俾KuKoc，仲入攞埋，俾啲信心自己，平時練波你都入唔少啦。」

「好！我唔會令大家失望，呢球點都要入到！」

果然不出他所料，對方只顧看守C Dragon和呀文，加上C Dragon的走位極具詐騙性，沒留意到我跑出個小空檔，趕在對方撲防前接球，再順勢拔起來投籃，還沒看清球的去勢，一股痛楚就使我眼前一黑，腳踝碰到硬物扭了一扭，該不會是那招吧？

幹，他真的墊我腳！至於我投不投進那顆球，我不敢張開眼看，但聽見皮球與籃框清脆的碰撞聲，結果已經一目了然。

我的主角光環去哪了！？

C Dragon看見我倒地，馬上衝前跟球證理論。

「墊腳嗰球證，做乜唔吹？」

「無侵犯到圓柱體，合法碰撞。」

「合你老母，識唔識波㗎屌你！」

「嘩！嘩！技術犯規。」

「屌你老母臭閻，死黑哨！」C Dragon繼續纏住球證。

「算啦，唔好搞大佢。」呀文他們拉住C Dragon。

「咩啊，唔講野係咪心虛！」

「由佢啦，我都無乜野。」我勉強站起來。

「收皮啦柒頭，點嘈都輸㗎啦，垃圾！」Walker又走來挑釁C Dragon。

「我上半場冇打嘅話，你地輸撚左好耐！」C Dragon一記左勾拳揮向他的臉。

「打我！你想死我就送你一程。」

「睇下邊個死！」

氣氛有點像當時CP3和Rondo大打出手的情況，他倆互相打了幾拳，之後又有幾個人加入，好不容易才被我們隔開，不然恐怕會釀成奧本山宮殿毆鬥的悲劇。

擾攘了約15分鐘，球賽重新展開，時間只餘下1.7秒。對方投進罰球後再發個邊線球，球證就鳴笛宣告終場，最後我們以69 - 73敗陣。

第三十七章

我忍受不了腳踝的刺痛，整個人跌坐在地上，雙手掩面。

「你無咩咁嘛，我擺啲冰比你敷，唔好亂郁。」C Dragon問人借來一個急救箱。

「對唔住，我累到大家輸波，仲要你幫我出頭。」

「邊關你事，你已經打得好好，唔係你啲回魂3分邊有得追咁，咁樣唔屌鳩裁判我仲係人嚟嘅！」

「你頭先搞到咁大，下場復活賽會唔會停賽㗎？」

「停咪停囉，反正我都返台灣，打唔到。」

「咁快，仲諗住可以同你拍住上。」

「下次實有機會，起唔起到身呀？」C Dragon向我伸手。

「好番好多，未死得。」我鬆一鬆腳腕。

「欸，有人搵你，我唔阻你地喇。」他看見Chloe笑了一笑，便轉身離去。

「呀風，你痛唔痛，頭先俾你嚇死啦！」

「濕濕碎啦，而家去踢波都仲得呀，啊...」我假裝若無其事的蹬一蹬地，怎料仍然很痛。

「唔好死頂，再整親就唔好啦。」

「知啦，長氣。」

「哼，人地咁關心你仲係度話人。」Chloe臉色一沉。

「Sorry，我唔係咁嘅意思。」我把她擁進懷裏。

「我似咁小氣咩？」

「似...啊...唔係...唔似。」

「你係咪想死呀！」Chloe搵了一下我的臉蛋。

「痛呀，點捨得死㗎，我死左咪見唔到咁正嘅女朋友。」

「又黎口花花，行啦我地去食飯慶祝。」

「慶祝？我地輸左㗎。」

「係我心目中，你係打得最好嗰個，就算形勢幾差你都無放棄過，滿場飛助攻助守，仲入左好多球3分，真係好型。」

「吓，但我應承左你兩次都衰左。」

「唔緊要，我知你有重視過我地之間嘅承諾就夠喇。」Chloe把手指輕放在我嘴唇。

雖然Chloe表面上有點嘴硬，但她內裏是多麼的溫柔體貼，多麼的善解人意。她每一個眼神，每一句說話，都徹底的打進我心扉，深深刻下一個個烙印。

她在我心裏佔據的位置越來越重，任何事情都離不開她，那怕在球場上也好。因為我一直追逐的不是籃球，而是她。

「不如返屋企沖個涼再出黎，我成身都係汗。」

「好啦，一陣係嗰度等。」

第三十八章

可能是敷冰的緣故，腳踝的痛楚沒當時那麼強烈，但走路還是要一拐一拐。

「BB，你仲好痛吖？」Chloe看到後，馬上衝過來扶着我。

「少少啦，好左好多啲喇，你唔使咁緊張啎。」

「咩唔緊張，你行到咁樣，我驚你傷到入面，不如去睇鐵打咯？」

「我真係無事，我自己feel到嘅，不過...」

「不過咩？」Chloe神色凝重地說。

「你預我應該會好啲。」

「玩野咩，我點預到你呀！」

「唔預，咁就抱抱啦！」我一下子撲向她懷裏。

「喂呀，好多人望住㗎，一陣先攞啦。」

「唔制。」我扁扁嘴。

「做乜成個細路咁，乖啦乖啦。」Chloe輕撫我的頭。

「我地食咩，好肚餓呀！」

「問我，你無諗好咩？」

「緊係有啦，唔知你想食日本野，鋸扒定放題？」

「放題吖。」

「你真係好肚餓，食左十幾碟喇啎。」

「今日真係用左好多精力吖嘛。」

「夠喇，唔好食咁多生蠔。」Chloe忽然按住我的手。

「吓。」

「食咁多生冷野隻腳難啲好㗎。」

「邊個話㗎，無事嘅。」我打算繼續食。

「唔准！」Chloe的眼神很堅定。

「遵命。」我只好放棄吃生蠔。

「聽話就乖喇。」

Chloe不知是不是有意，有幾次用她的白滑美腿掃過我的小腿。

「啊！」不讓我吃生蠔，就作弄一下她吧。

「做咩呀？」Chloe嚇了一跳。

「你踢到我，啊...隻腳好痛呀。」

「Sorry，我無心㗎。」

「死啦，好似仲痛過係球場嗰陣。」

「點會㗎，最衰都係我啦。」

「你過黎幫我睇下。」

「咁樣我就唔痛喇。」我趁Chloe蹲下親吻她的額頭。

「衰人！你呃我！」

「都唔算，咁我真係仲痛吖嘛。」

「唔睬你呀。」

「玩下啫，對唔住啊。」

「好過份囉，搞到我咁擔心。」Chloe氣得鼓起泡腮。

「唔好嬲啦，欸，你唔好郁。」

「又想點？」

「喂呀！」我把一小片蛋糕點在她鼻上。

「作死呀你！」她馬上還擊，拿起一大塊蛋糕弄到我面上。

「女俠，饒命呀！」我舉高雙手投降。

「你都有今日。」Chloe繼續加強攻勢。

「我知錯啦，咁樣你唔辦咯可？」

「嘻嘻...今次就咁算，哈哈...你個樣真係好好笑。」

我對着手機照照，才驚覺滿臉都是cream，出手也用不着這樣狠毒。

「頂，真係立即變白，你使唔使咁重手啊！」

「你自己擺黎衰咋，唔怪得人。」

「差啲唔記得添，拍低post上IG先。」Chloe拍完照，馬上跑走。

「咪走呀你，俾我捉到實食左你！」

「你捉到先算啦。」她伸伸舌頭。

第三十九章

不經不覺間，我和Chloe一起了已經有五個月的時間，雖然偶有爭執，不過也沒怎影響我們之間的感情。

尚記得我們放榜的成績不俗，彼此都成功選取心儀的學科，我進了Polyu BBA，Chloe就進了CU Art，大學生活佔據我們不少的時間，但我們約定好每星期最少見兩次面，不管再忙也好。

其實我對大學生活不太感興趣，玩了個O Camp就作罷，算是認識了幾個同學系的人，關係算不上熟稔，大多數都只是談論學術而已。

大多數空閒的時間，我還是跟呀文和Save一起度過，以及打磨球技，繼續打一些業餘比賽。

相反Chloe就比我活躍多了，上莊，住hall，part time，大學五件事完全做足，認識了很多人，更獲得女神的稱號。

以她這樣外向的性格和出眾的外型，成為風頭躉完全不足為奇，據知追求者也不少，但都被Chloe一一拒絕。

「BB，你入到U都唔玩下，你唔覺得好嘅咩？」有一次Chloe問我。

「呢啲野唔係太啱我，有你地就夠喇。」

「咩你地呀！你唔係得我咋咩，你講，係咪仲有第二個？」Chloe搥了一下我的手臂。

「唔係呀，我係講呀文佢地，我又點會做啲對唔住你嘅事啲。」

「同你講下笑咋，睇下你嚇到面都青埋。」

「我邊度識到其他女仔，反而係你，聽講好多仔溝你，開心死啦。」

「我都無理佢地，講左我有男朋友，你呷醋啊？」

「好正常啫，見到有人追你點都有啲唔開心。」

「放心啦，你要對我有信心。」

「我信得過你，係呢，過幾日得唔得閒黎睇我打波？」

「應該唔得喇，有兩份paper要交，下次吖。」

「咁好啦。」

「你會唔會覺得我太自私，拍拖咁耐都無為你做過乜野，我係咪一個唔合格嘅女朋友？」

「你點會咁諗㗎，愛情從來都唔計較邊個付出多啲，知道我地都愛大家就得，係我心目中你係最好最好嘅女朋友，以後唔準講埋啲咁嘅野呀。」我緊緊擁着Chloe，在她耳邊低語。

「多謝你。」她把頭靠在我的肩膀。

「傻瓜。」我輕撫她的秀髮。

第四十章

這一天是平安夜，理所當然要跟Chloe一起度過，難道要獨自一個窩在家裏感受空虛寂寞。

只是我沒想過這天對我們有着如此深遠的影響。

「係呢BB呀，當初點解你會鍾意我嘅？」Chloe繞住我的手。

「做咩咁問嘅？」我搖搖頭。

「喂呀，我要你講就講啦。」Chloe扁扁嘴。

「好啦，我由第一眼就覺得呢個女仔好靚，好可愛，跟住咪諗方法接近佢，相處落就唔知點解唔想見到佢傷心，好想呵護佢，剩係想見到佢對我笑，無時無刻都掛住佢，咁我就諗我應該係鍾意左個女仔。」我娓娓道來。

「好衰㗎你，你做咁多野係有目的嘅，等我仲以為我地嘅相遇係緣份，哼！」

「唉，咁早知我就唔去溝你啦。」

「咩話！而家好難為你咩！」Chloe鬆開手，怒瞪着我。

「講笑啫，緣份都可以自己創造出黎，如果唔係我都搵唔到咁好嘅女朋友啦。」

「真係俾你激死。」Chloe剛才的怒意經已化為笑意。

「我不嬲都係咁㗎啦，但你又覺得開心㗎。」

「知你叻啦，喲，你份禮物呀。」Chloe從袋裏拿出一份包裝精緻的禮物。

「吓，唔使搞咁多野㗎。」

「我好比心機整㗎，你係咪唔想要啊？」

「我唔係咁嘅意思，只不過我乜都無準備，Sorry呀」我搔着頭說道。

「唔緊要啦...」Chloe表面上是這樣說，但我看得出她是有點失落。

「玩下你咋，我都有啲嘢要送俾你。」

「嗯？咁份禮物係邊呀？唔覺得你有帶係身嘅。」她一臉疑惑的看着我。

「Hehe，唔係我身上面呀，傻妹。」

「咩嚟㗎，好想知道呀，快啲俾我啦！」Chloe向我撒嬌。

「你跟我嚟啦！」

我走向一隊街頭band，簡單一個眼神跟他們示意，然後拿起結他，腦海裏不由自主的響起遺忘已久的旋律，猶記得我答應了那個人，當我學會了彈這首歌，她一定要做第一個聽眾，可惜的是一切已來得太遲。

雖然如此，我還是想唱這一首歌，因為是Chloe讓我再一次感覺到愛的滋味，是她帶給我勇氣，

是她令我重拾信心，

是她讓我重新學會笑，

是她教會我忠於自己，

是她一直在身邊陪着我，

是她把情感灌注進我的生命，

我不知不覺間已經成為了她的信徒。

第四十一章

直到你什麼話都不說 連僅有的淚都忍住
我才知道陪著你上路 快樂不是唯一任務
直到我視線開始模糊 而你卻滿臉不在乎
我才明白 學會變法術也回不到最初
一邊愛 一邊走 我已經成為你信徒
相信情到深處不怕孤獨
如果我們不曾看過對方怎麼哭
如何知道快樂一轉身就是痛苦
想不到你絕望的淚水一剎那讓我大徹大悟
如果我們不曾走過感情這條路
如何知道心魔是最沉重的包袱
年少輕狂的好日子 一懂事就結束

那次Chloe看見小柔親吻我，看到她強忍淚水的樣子，我才醒覺到維繫感情不只是雙方都覺得開心就足夠的。

自從那次後，我告訴自己不能再讓Chloe如此傷痛，如果我再一直犯錯，我們可能就回不去最初，當她對我感到絕望，我們之間就會盪上句號，所以我發誓，隨了快樂，一定要把幸福帶給她。

當初聽這首歌時，純粹是認為旋律易記，歌手唱得很動聽，直到長大後才有點領悟到歌詞的含意，把感情投放到歌聲裏。

沒想到的是那個人此時此刻竟然站在我面前，沒可能的，我是不是出現幻覺。她察覺到我盯着她，就躲避我的視線，然後轉身走掉，隨即消失於人海。

我立即放下咪高風，連Chloe也沒理會，便追了上去。

「Rachel，真係你？」

「唉。」Rachel放下腳步，回過頭凝視着我。

「估唔到可以見返你，其實...我好掛住你。」我走上前擁着她。

「我都係，但你會唔會激動左啲？」

「對唔住。」我馬上鬆開她。

「唔緊要，係呢你頭先唱得幾好聽，搞到我都有啲眼濕濕。」Rachel揉揉眼。

「我係唱俾你聽㗎。」

「唔好玩啦，俾你女朋友聽到實唔放過你。」

「你又知我有女朋友嘅？」

「應該係嗰個黑衫，高高瘦瘦嘅女仔，一睇佢望住你嘅眼神就知啦。」

「嗯。」

「你快啲返去搵返佢，唔使理我。」Rachel打算離去，但被我一手拉住。

「我唔會俾你再走，以後都係。」

「做乜咁講野啊，你女朋友等緊你㗎。」Rachel試圖甩開我的手，但反被我捉得更緊。

「因為...我...對你...仲有...感覺...」

「好朋友嘅感覺㗎嘛，你放開我先啦。」

「萬一我放左手，你又粒聲唔出走左去咁點？」

「今次唔會，我返到去打俾你。」Rachel眯眼對着我笑。

「你唔好呃我呀。」我鬆開了Rachel的手。

「我幾時有呃過你啫，bye」她揮着手對我說再見。

第四十二章

Rachel走了後，我才驚覺剛剛遺忘了Chloe，看着電話數十個未接來電，心裏不禁閃出一種不安的預感。

我馬上趕回去找Chloe，只見她左顧右盼，四處找尋我的身影。

「BB，你頭先跑左去邊，無啦啦走左去，嚇死我啦。」Chloe一看到我就跑過來攬着我。

「Sorry，我見到個好耐無見嘅朋友，咪跑過去追佢囉。」

「你講，男定女嚟㗎？」Chloe叉着腰問我。

「男，係女仔我點敢呢。」我也搞不懂為甚麼我要說謊。

「算你啦。」

「我錫返補數啦。」我向Chloe的臉吻下去。

「唔得，我要錫嘴呀。」她嘟起嘴的樣子真的很可愛，叫我怎麼忍得住。

「點呀，你滿唔滿意我份聖誕禮物？」

「吓，有咩？」

「唔好扮野嗰，我唱左成隻歌俾你聽。」

「同你玩下咋，好滿意呀，係我咁大個女最鍾意嘅聖誕禮物。」

「我都係琴日先諗到，仲驚你會唔鍾意添。」

「點會呀，我估唔到你咁大膽係咁多人面前唱歌，真係好型。」

「唔型點襯得起我女朋友嗰。」

「唔使賣口乖啦，而家有咩做呀靚仔？」

「無呀，食自己囉。」

「乜你咁對女朋友㗎。」

「梗係唔係啦，我想食你。」我在她耳邊輕聲說。

「咦，好衰㗎你。」Chloe輕輕推開我。

「黎啦黎啦。」

「上唔上嚟我屋企？」Chloe耷着頭說道。

「哦，你真係想我食你，曳曳啦你。」我篤一篤她的鼻子。

「咩啊！你地啲男人咁鍾意用下面諗野㗎！」

「講笑咋，你知我都唔係啲咁嘅人㗎。」

「點知你啫，我又唔係你肚裏面條蟲。」

差不多抵達Chloe家的時候，我接到電話，未看就知道一定是Rachel，一想到這我心裏莫名有種忐忑的感覺，很想接聽，但手指一直顫抖着，按不下去，是Chloe替我按下鍵鈕。

「你不如聽左電話先，可能有緊要事呢。」

「哦...」我拿起電話。

「喂呀風，我應承左就一定做得到嘅。」

「係...係...你...」

「搞乜漏晒口，你扮細細粒啊？」

「無，有啲估唔到係你。」

「咁多年你都無轉過電話，我頭先不知幾驚會打唔通。」

「我就係死都唔轉，就係驚有一日你想搵都搵唔到我。」

「得啦，唔阻你地，遲啲出黎食飯，介紹佢俾我識下。」

「好，一定。」

「你地玩得開心啲啦，Merry Christmas！」

「Merry Christmas，bye！」

第四十三章

「邊個嚟㗎，係咪你個ex？答我啊。」Chloe雙手鎖住我的脖子。

「細力啲呀，係頭先撞到嗰friend黎咋。」

「比我知道你哋我，你死十次都唔夠！」

「唔敢唔敢，不過BB你唔會咁狠心嘅。」

「你實有野瞞住我，係咪！」

「係呀，我諗住黎緊你生日俾啲驚喜你，你係咪想知啊？」

「講左就唔好玩啦。」

「又係你話唔好哋你嘅，咁而家啫係點？」

「呢樣就唔算啦，咁我地仲繼唔繼續啊？」Chloe害羞得面頰也變得泛紅。

「Sorry呀，我有啲劫，不如下次先啦。」

「係咪你覺得我唔吸引，所以你唔想...」Chloe楚楚可憐的看着我。

「無呢咁嘅事，只係我有啲眼瞓，我驚今日狀態唔係咁好，滿足唔到你。」我用真摯的眼神看着她。

「真係嘅？」

「我點會哋你㗎。」

本來Chloe想送我回家，但我說不想她太操勞，所以還是自己一人歸家。

我萬萬也想不到她竟然在這一天再次走進我的生命，我曾經以為我把一切徹徹底底的放下，終究還是忘不了。

說真的，累的不是我的肉體，而是我的心靈，剛才那一通來電完全把我的慾火撲滅掉，思緒更是浮起一種莫名的累。

從Chloe的眼裏，我看不到自己，只見一個失去靈魂的軀殼，面對着自己的女朋友，內裏卻想着另一

個女孩。

這一刻的我分不清我一直愛的到底是誰，是Chloe，是Rachel，兩個都愛，還是愛自己而已，越想就越煩亂。

為甚麼，為甚麼我又會碰上你，上天總是要考驗我，難道讓我簡簡單單的愛一個人就不行嗎？

第四十四章

這一切要從大約十年前說起。

那時我家剛搬來現在的住所，因為我爸想和他的好基友住近一點，於是搬來同一棟大廈，就這樣我認識了叔叔的女兒Rachel。

我們經常到彼此的家裏玩，關係也日漸熟絡，不經意的我就對她產生了一種感覺，好像一兩天不見面，心裏就會揪住揪住的，也許當時年紀尚小，單純的覺得我們是好朋友而已，

現在回想起來才憶起我們似乎做過頗多親暱的舉動。有時Rachel會跟着我一起打球，有時我會到她家裏玩煮飯仔，牽手對我們來說有如家常便飯，甚至曾經睡在一起，

那時Rachel常常嚷着說長大後要做我的新娘子，爸爸媽媽也沒好氣的開我玩笑，把新抱仔掛在嘴邊。

接着又是那些老生常談的情節，女主角到了外國讀書，起初我們差不多每天都會在Skype聊天，後來由於學業、圈子、時差的影響下，不知不覺由一天一次，到三兩天，再到每月一兩次，關係理所當然逐漸變得疏遠了。

有時突然心癢癢想找Rachel，又怕打擾她，這麼一弄之下，就算有找她，很多時都是聊一些無關痛癢的事，「做緊啲咩」，「食左飯未呀」，「天氣點呀」，大多數情況都是點到即止，跟最初毫無顧忌的談天說地大相逕庭，那當然連我和Chloe拍拖的事也沒有向她提及過。

現在回想起，昨晚我和Rachel對望時，她的表情好像有點奇怪，笑容像是硬擠出來的，難道她也對我.....

不會的，小時候說說笑而已，但她不太自然的反應似乎出賣了她。

在街上茫茫然的走着，我甚至連撞跌了別人也沒為意到。

「屌，係你？！做乜行路唔帶眼，撞到第二個你實俾人屌死都似！」那個男人的聲音很熟悉，抬頭一看方才發覺是Lue Sir。

「Sor，呀sir乜咁啱呀...」

「頭先同個朋友食完飯，你呢，唔洗陪你個靚靚女朋友咩？」

「Emm...琴日先陪完佢，唔講住啦，下次練波再見啦。」

「唔好走住，我睇你個眼神，都似係有啲事嘅，唔怕同我講嘞。」他擋住了我的去路。

「吓...我...無嘢嘞，你睇錯啦，哈哈！」

「唔洗扮啦，一提起女~朋~友，成個面色唔同晒，肯定有啲嘢。」

「唉，呀sir你咁都睇得出，好啦好啦，我講你知啦。」

「等我買幾罐啤啤佢先。」

第四十五章

我們走到海濱一處坐下，吹吹海風。

「噏，整返罐先。」Lue Sir遞了罐啤酒給我。

「唔該。」

「正，好耐都無試過吹住風飲下酒啦！」

「嗯，我都係咁話。」我點一點頭。

「嚟，講下你煩緊咩。」Lue Sir搭着我的肩膀。

「你係咪gay㗎？我條女見到實斬死你啊！」

「Gay你個死人頭！想斬阿叔，放馬過嚟，喂你條友唔好係度轉移話題㗎。」

「怕左你，係咁嘅，琴日我撞返個好耐無見嘅朋友。」

「唔洗審啦，肯定係女，仲要幾正下嘅，有無圖睇？」

「又話幫我，做咩變左睇女㗎，不過佢真係幾好嘅，比你睇下啦。」我點入Rachel的IG，才發覺已經很久沒看過她發的post了。

「睇過，有無搞錯呀，你啲女一個正過一個，公平咩？而家靚仔少少大晒咩？」

「我都唔想㗎，慘得過啲女受我溝呀！」

「咁唔洗煩啦，要晒佢咪得囉屌你！」

「得就唔洗煩啦，媽啊我好亂啊！」

「唔玩啦，認真，咁耐無見，你真係仲鍾意佢？」

「我自己都唔知，以前係有，佢走左之後好似放低左，又好似無放低過，都唔知點講。」然後我一五一十地說起當年我和Rachel的事。

「咁你愛唔愛而家條女先？」

「愛，好愛佢。」

「愛咁咪得，搞掂！」

「咩？師傅我唔get啊！」

「其實你應該無再鍾意佢，你嗰個大波青梅竹馬，可能你只係想彌補返之前錯過左嘅遺憾，先有個錯覺，猶豫啫，我覺得咋，你自己再諗諗啦。」

「嗯，又好似係咁，多謝你點醒左我。」阿sir一席話簡直是一言驚醒洛克人。

「嘿嘿，洗乜講，你估我淨係識教波咩，之前有幾條友仲要阿叔幫佢地溝女，你都算係咁啦，都夜啦，你條女等緊你呀。」

第四十六章

聽過Lue Sir的意見後，我好像已經完全想通了。

現在的我對Rachel的感情絕對不是愛情，純粹是內疚和自責導致自己產生了錯覺，認為自己還愛着她，想跟她在一起。

從前錯過了一個她，或許未嘗不是一件壞事，令我找到下一個她。

愛情本來就不是三言兩語可以解釋出來，沒有百分之百的對錯，有時候不必想太多，相信自己的直覺，相信對方，想愛就去愛，結果不一定會是完滿，但至少自己不會後悔。

只有兼具甜蜜和傷痛才能稱得上是愛情。

雖然我和Chloe相識僅僅半年有多，相處的時間和經歷的事相比和Rachel少得多，但感覺要來得更濃烈，更刻骨銘心。

Rachel的出現反而更肯定了我對Chloe的愛。

既然我摸清楚自己的心，這樣不就依舊相安無事嗎？

慢着，我解決了自己的部份，但Rachel的部份還未處理好，總覺得她心裏隱藏着一些心事，而且是和我有關的。

反正也要和Rachel敘敘舊，那就順道跟她說清楚，看看能否讓她釋懷吧。

幾日後.....

「其實呢，點解你會返嚟香港嘅，又唔同我講，咁衰㗎你。」

「咩呀，你無睇我IG㗎咩，仲話係friend，好差囉你！」

「係我唔啱啦，等我而家睇下先，咪住先，你IG叫咩？」

「係咪玩嘢呀你，本小姐嘅IG都唔知，打得少呀你！」Rachel使勁拍打我的手臂。

「痛呀痛呀，講笑咋，靚女嘅IG點會唔記得吖。」
我對她單一單眼。

「白痴仔，有無咁誇張，你對個個女仔都係咁口花花㗎？同你女朋友講話你周圍撩女仔先...hehe...」

「嘩！頂你，死得人㗎！」

「睇嚟你俾佢教到聽聽話話㗎。」

「係呀係呀，滿意？」

「你而家咁咪幾好，估唔到幾年之間咁多嘢唔同左，而家呢個香港真係唔知點講，有啲陌生又有啲熟悉咁。」

「我地都係啦，我走果時你仲話18歲會飛嚟搵我，會俾個滿意嘅答覆我，點知...」她接着說。

「Sorry，最後我...都係做唔到...」

「唔洗sorry㗎，都覺得你係講下㗎咋，我無放係心度。」

「上次...上次呢，我咪講左對你仲有咩...咩嘅...」我摸着頭說道。

「嗯？」她惘然的凝望着我。

第四十七章

「呢幾日我諗得好清楚，我對你已經無左以前嗰種感覺，我嗰日唔應該咁同你講，對唔住呀。」

「唔洗對唔住啲，我都知你係突然間見返我，先可能會有咁嘅錯覺啫，你無錯呀，唔需要自責。」

「同埋我都放低左啦，好多嘢錯過左就係錯過左㗎啦，或者嗰時我地都有踏前一步嘅話，可能...」Rachel開始有點哽咽，然後別過臉去。

「可能呢個先係對我地最好嘅結局呢，就算當時我地一齊左，我地都未必忍受到long d，遲早都會分開，可能搞到關係仲差，算啦唔講啦，都過左去啦，你唔洗咁在意啲。」

「我...無事，只...係一諗起...心入面...就好似有個...遺憾，好可惜咁，有時我會諗如果時光倒流返去，我留低係度，就算我地無拍到拖，繼續青梅竹馬咁相處都好吖。」

「但係我地無可能成世都做到青梅竹馬，可能有一日你或者我唔想再等對方，之後會同其他人一齊，我地就係怕，怕行前左一步，就會做唔返朋友，明明大家都feel到對方係有意思...」

「你講得無錯，我地無可能一直都係咁，人始終會長大，大左好多野嘅睇法又會唔同左，想要嘅愛情同細個可能會唔一樣，人會現實左，唔會再想為呢段關係無止境等落去，之後我同你有左另一半嘅話，根本無可能好似以前咁樣相處。」

「起碼我地都放低左，仲做到朋友，咁都唔錯吖。」

「見到你地咁幸福，我都好戥你地開心。」

「你都得㗎，你條件咁好，實大把仔溝你啦。」我取笑一下她。

「咦~唔好笑我啦，邊有咁誇張啫，我又唔係咩女神，不過真係好多謝你，同你講完個心舒服左好多。」

「我都係呀，同你講完成個人鬆晒，唔洗再煩lu...係啲，你今次係咪唔會再走啦？」

「唔係呀，sem break完左之後又要返去嗰邊，放假都會盡量返嚟，遲啲grad左就唔知啦，可能我會自己搬返嚟，到時就會成日煩住你㗎啦，hehe~」

「唔好啦掛，細個未比你煩夠咩，唔好搞我啦，快啲走，以後唔好再返嚟呀。」

「咁絕情㗎你，話晒都咁多年朋友，你咁樣對我，好傷心囉。」

「講下啫，我唔會咁衰嘅，你以前咁照顧我，我照顧返你又點話啫。」

「講呢啲，俾你搞到有啲感動添。」

我們繼續說說笑笑，時候也不早，於是我便送Rachel回去酒店。

「遲啲你會送我機個可？」她在酒店門口停下腳步。

「會呀，順便見下世伯伯母，咁遲啲見啦。」我打算離去。

「阿風，唔好走住，我仲有啲野想做。」

「嗯？」

她突然跑過來攬住我，我完全反應不過來。

「做咩呀傻女？」

「你就俾我攬一陣啦，一陣就夠啦。」

「你就唔洗講啦，想攬幾耐都得。」我也輕撫她的背部以示回應。

第四十八章

跟Rachel告別後，我本以為一切已經結束，
但上天偏偏又要再一次作弄我。

「你而家係邊？」Chloe發了個message給我。

「啱啱行完街 而家返緊屋企」

「得你自己一個行？」

「唔係呀 同朋友」

「咁呢個你點解釋啊」她send了一張我和Rachel擁抱的相片來。

有沒有這樣巧合，又不是在拍戲，她是如何發現的，
我真的快要瘋掉了，在街上連番碰到熟人的可能性
有多大啊？？？

「BB你信我啦 我同佢清白㗎 好耐無見 所以先攞下咋」

「邊個係你BB 唔好咁叫我 攞下？
我個friend見到你地攞左好耐 朋友會咁嘅咩 你當我傻㗎」

「我無呢你啊 我同佢真係好多年 好好嘅朋友
佢去左外國幾年 最近先返黎 講bye bye嗰陣佢話要攞
我先俾佢攞咋 你信我啦」

「咁你可以say no㗎嘛 根本你就好enjoy 人地咁靚女
咁好身材 我係你都會攞啦」

「我無咁諗啊 係我做錯啦 你點先肯原諒我呀 你信我啦
我心入面淨係得你一個」

「唔好話我唔俾機會你 聽日你過嚟我度
講清楚你同佢嘅事 再睇下點囉」

「好 你等我」

還好Chloe願意給我一個機會解釋，這次應該問題不大吧，不過我都是決定先跟Rachel談一談。

「喂，有咩事呀？」

「唉...Chloe見到頭先我地攞住啊。」

「吓？佢點會知㗎？」Rachel的語氣顯得很驚訝。

「佢話有friend睇到晒。」

「我會唔會累到你㗎？Sorry呀。」

「佢叫我聽日去搵佢，應該ok嘅，好快無事㗎啦。」

「使唔使我同佢講下呀？兩個人好似有說服力啲㗎。」

「我搞唔掂先搵你幫手啦，唔想麻煩到你。」

「咁好啦，希望你地快啲好返啦。」

掛斷電話後，我便攤在床上，呆呆的看着天花板。

這個時候都沒甚麼好想的，照直和她說就可以了，

我有信心。

為什麼？

我對自己有信心，對Chloe有信心，

對我們的愛情更加有信心。

第四十九章

Chloe視角:

這一天，我和姊妹們一起shopping，本來心情挺好的，誰不知收到朋友傳來的圖片，見到阿風和一個女仔擁抱，心情瞬時沉了一沉。

起初我想他們應該無甚麼的，抱一抱而已，沒甚麼大不了，我要相信阿風，他不會背着我和其他人...
...

我那個朋友又send message給我。

「你條仔同條女攞左好耐 條女仲喊晒咁口」

「你知唔知佢邊個嚟㗎 你諗住點做呀 要唔要chok下佢」

「我有分數啦 唔該你」我隨便地回覆她。

也許是因為我上一個前度多次出軌，令我有點對愛情失去信心，跟阿風一起後雖然好轉不少，但有時會對自己或者阿風沒有信心，

想想下就很自然的覺得阿風真的會背叛我，畢竟那個女生比我漂亮，身材又比我好，喜歡上她也不太意外。

「Chloe你做咩呀，面色唔係幾好㗎，係咪發生左咩事？」我的姊妹們問我。

「哈哈...我無嘢呀，係有啲劫啫，我想返去先啦。」

那個晚上，我滿腦子都是他們擁抱的畫面，比起憤怒，更多的是害怕，我真的很怕，怕阿風會和我說分手，為甚麼會這樣的，每一次我都以為自己找到對的人，到頭來又不歡而散，我到底犯了甚麼錯？

我一方面很想知道他是怎樣想，另一方面又怕聽到讓我失望的答案，內心掙扎了很久，到最後我還是跟阿風說，我發現了他們的事。

阿風極力澄清他們是清白的，強調只是愛我一個人，感覺到他不像在說謊，加上後來那個女生又在IG dm我，

向我解釋清楚他們的關係，心裏立時安定下來。

可是我又不能這樣輕易的原諒她，所以我決定玩弄一下他，測試到底他會不會對我坦白。

第五十章

第二朝一起身，成身無力，頭好L痛，一摸，嘩屌好慶，

睇嚟應該係發燒，平時又唔發，重要關頭先嚟發燒，

想我死咩！

搞左陣先格硬起到身，都無乜胃口食野，

求其整2粒發燒藥就出門口去Chloe度。

食完藥叫做好左啲啦，頭無咁痛，不過個身都係無乜力，

腳步浮浮咁，明明平時行10分鐘就到佢屋企，

今日都搞左差唔多半個鐘先去到。

終於去到佢屋企門口，唔知點解突然覺得好L緊張，

仲緊張過DSE考oral啊，執返靚仔個樣，再深呼吸，

扮到無事咁搵門鐘。

「你嚟啦？」Chloe開左度門比我入去。

「係呀」

「入嚟先講啦」

我入度去環顧四周，上次上嚟都無乜留意，

而家先知佢屋企都幾靚下，啲裝修同家私都唔嘢少。

「喂 你望咩呀 我屋企人出晒去 你唔使驚」Chloe拍一拍我。

「哦無呀 你屋企都幾靚 望多兩眼啫」

「過去坐低先啦 你唔係有嘢要同我講咩」她指住張梳化。

「emm...emm...」到左真係要講，個人即刻拗晒底，唔知點講出口。

「你肯講未呀 係咪做左啲唔見得光嘅事 所以唔敢講呀？」Chloe塊面越嚟越黑，我係指個面色。

「唔係...我...我...其實...要點講好呢...」

個頭又開始痛返，果然2粒藥係止唔到燒，

仲要有啲眼瞓，個腦根本run唔到，唔知點答佢好。

「比機會你又唔講 陳澤風你到底想我點呀！」佢好嬲咁對住我講，跟住企左起身。

「唔好嬲啦...」我捉住左佢隻手。

「欸 你隻手做咩咁凍㗎？」佢之後伸手過嚟摸下我額頭。

「啊！你發燒做咩唔出聲啊 嚟啦我同你去睇左醫生先啦」

「唔使 我ok呀」我企起身，頭有啲暈，腳步都有啲唔穩。

「仲話ok 你睇下你 企都企唔穩 唔好再死頂啦」

「但係...我都未同你...」

「而家唔好講呢啲住 等你好返先算啦」

佢都未等我答佢，就夾左我去睇醫生。

第五十一章

行去睇醫生嗰時，有幾下個人暈暈地咁，唔係Chloe拉住我嘅話，我應該會跌係條街度。

「捉實我啦 我驚你跌親啊」Chloe同我講。

「係...」

去到診所之後，我覺得好劫，不知不覺之間就瞓着左。

隔左陣，Chloe叫醒左我，

原來我成個人攤左係佢大脾度瞓，

醒返見到全世界都望住我地，

Chloe佢紅都面晒，喇喇淋拉左我入去見醫生。

睇完醫生就返返去佢屋企，

食少少野再食埋藥，

跟住就上左佢張床度瞓。

我好似瞓左好耐，感覺好似瞓左五六個鐘，

醒左一拎轉頭，就見到Chloe佢坐左係床邊瞓緊眼瞓，

睇嚟今日都搞到佢好劫下。

「Chloe Chloe」我走去拍下佢。

「嗯...你醒啦 有無見好啲呀 你抖多陣 我斟杯水比你先」
佢一輪嘴咁講。

「你唔洗咁緊張啲」我拉停左佢，
再捉住佢隻手放係我額頭。

「退左燒啦 我好返好多啦 你放心啦」

「係咪真㗎？」

「自己身體我好清楚 今日多謝你咁照顧我」

「咁我係你女朋友呀嘛 照顧你好應該嘅」佢抽返隻手出嚟，再企起身想行開。

「女朋友呀 唔好走住」我一野拉返佢落嚟，坐返落張床，再一手攬住佢。

「喂 你想點呀 我未原諒你㗎」佢翹起對手，嬲爆爆咁望住我。

「我有啲好重要嘅野要同你講」

「你講吖」佢唔再用凌厲嘅眼神睇住我，望落無頭先咁嬲。

「其實你見到個女仔 佢叫Rachel
係我一個識左好耐好耐嘅朋友 可以話係我嘅青梅竹馬」

佢聽到青梅竹馬之後，個眼神有啲唔同左，

見到我定睛咁望住佢，就微微縮開左。

「佢走左去澳洲幾年 就係平安夜嗰日撞返佢
我都唔知佢突然之間返左嚟」我繼續講落去。

「咁你地以前嘅關係係點？」

「以前Rachel係香港嗰時 佢住我隔離 我地成日一齊玩
不經不覺就鍾意左佢 但係我唔夠膽表白
所以最後都無一齊到」

「咁你而家仲有無鍾意佢？」Chloe咬着嘴唇，
雙手捉實件衫，好似好緊張想知個答案。

「呢幾年我覺得自己係放低左
之後遇到一個女仔就好快鍾意左佢」
我側着頭微笑咁望住佢。

「咁啫係無？」

「佢返嚟搞到我有啲心煩 我有猶豫過係咪仲鍾意佢
不過最後都搞清楚左 只係內疚感令我有咁嘅錯覺
我已經無再鍾意佢」

「咁上次件事你點解釋？」

第五十二章

「上次係佢行過嚟攞住我 作為一個好朋友
我無理由拒絕佢 見到佢喊 咁我咪安慰下佢囉
真係唔係你諗咁樣㗎」

「我無諗錯囉 夠...夠啦 我忍唔到啦
唔玩你啦 傻仔 哈哈...哈哈...」Chloe撲哧咁笑左出嚟

「吓 發生咩事呀
Why are you doing this ar?」我成個人呆左

「其實我知係咩事啦 琴日Rachel已經同我講晒
不過你就衰囉 唔一早對我坦白 搞錯 哼」

「Sorry 我驚你亂諗嘢
咪無同你講 咁你係咪真係原諒我啦」

「今次算你啦 不過點解你之前無同我提過佢㗎」
Chloe篤一篤我個鼻

「我諗住Rachel都唔會返嚟 所以就無同你提過佢
同埋驚你吃醋呀嘛」

「我似係啲咁嘅人咩 雖然一開始我有少少懷疑
不過諗落又覺得你應該唔會咁對我嘅
跟住Rachel又係ig度同我解釋
但係你條粉腸又唔肯講

咪唯有扮嘍逼你講囉」

「呼...嚇得我吖 從來未見過你咁嘍

幾驚你唔信我啊 好彩而家無事啫」

「我啲戲係咪好好呢 睇唔出平時我咁溫柔

惡起上嚟都似模似樣呢 嘻嘻...」佢古古惑惑咁對住我笑

「呃...」

「你咩意思呀 我有講錯咩」

「唔係 未聽過有人咁樣讚自己 不過我鍾意」

「超 口花花啦你」

「真㗎」

第五十三章

「好啦 其實我仲有啲嘢想做 你合理眼先吖」

「做咩呀」Chloe眼仔碌碌咁望住我。

「你一陣就知㗎啦 嚟啦 你俾隻手我先」

「哦」Chloe伸隻手過嚟，之後再合理眼。

我擺左度戒指圈size嗰件嘢出嚟

(即係林家謙mv成日用嗰樣嘢)，再套落我地無名指度。

「咦 唔通你」佢似乎都feel到個圈圈。

「阿風 我可以睇未呀」

「你睇啦」

「吓 呢個咩嚟㗎 我仲以為你係送咩俾我添」Chloe先係呆左一下，再扁扁嘴。

「小姐 咁我都要知你個size先㗎嘛 唔啱size嘅話
咪搞到無晒mood囉」

「咁又係 欸 咪住 點解...點解你要送戒指俾我」

「四個字 我要娶你」我chok左個好深情嘅眼神望住佢。

「吓 你認真㗎??？」Chloe露出一個好難以置信嘅表情。

「我唔會搵呢啲嘢嚟玩 雖然我地只係一齊左半年到

但直覺話俾我知 你係我嘅Miss Right

韓心怡小姐 (Chloe全名) 我想成為你嘅另一半

你可唔可以俾個機會我愛你一世」我跪低同佢講。

「呀 咁突然 唔係我唔想 咁...咁仲有我地爸爸媽媽個關

佢地會唔會反對㗎 似終我地仲細 仲讀緊書

咁樣...咁樣好似唔係咁好...」

「你唔使咁擔心啦 佢地嗰邊交俾我啦 我會說服佢地㗎啦

總之一畢業我就會娶你 你以後就係我嘅人」

「喂 我未應承你㗎 你都唔夠誠意 今次我唔接受㗎

都唔夠浪漫 兩手空空 咩都無 咁樣就想我嫁俾你

想錯你個心呀」

「收到 靚女 我返去會準備 求到你滿意為止 ok未」

「咁就差唔多 但係呢 佢地真係...真係反對咁點呀」

「外間很多反對我愛你的聲音~讓我的愛惹起公憤~」

「乜野呀」

「反對無效囉」

「妖 你好低能呀」

第五十四章

Chloe佢講得啱，我地父母可能會反對我地咁做，
始終結婚都唔係一件兒戲嘅事，所以都要問左佢地先。

其實我老豆老母一早知我有拍拖，
成日都催我帶Chloe返去俾佢地見下，
係估唔到第一次就搞到咁大。

佢兩個聽到之後又無乜好大嘅反應，反而仲好支持我地，
話我執到啦，有過咁好嘅女仔肯要我，
不過佢地又講得無錯嘅，有時仲覺得Chloe先係佢地親生，
錫佢錫到呢...

好啦，仲有最後一關，Chloe嗰邊唔知過唔過到呢。

見Chloe父母嗰日~

「我今日個look得唔得 份禮物會唔會太失禮 仲有...」
我真係好L緊張。

「你唔使咁擔心啦 我Daddy佢地好隨和㗎 無事嘅無事嘅」Chloe嘗試去安撫我。

「係啫 但都係有啲驚」

「ok嘅 上次你爸爸媽媽都ok 今次都得嘅 你信我啦」

「好啦」

一入到Chloe屋企，Chloe媽咪就嚟迎接我地。

「阿女你地嚟啦 你男朋友仔幾好樣㗎」

「多謝auntie，我買左少少野俾你地」我摸住頭傻笑。

「乜咁客氣啊 快啲入嚟啦 喂爹地 佢地嚟左啦」

「知啦知啦」Chloe爹地係房入面行出嚟。

「你就係風仔呀，當自己屋企得嚟啦，唔使客氣㗎」

「哦，係」

「我地傾吓計先啦」Chloe媽咪捉住我，跟住係咁講Chloe細個啲柒事。

「喂呀 媽咪 唔好講啦 好醜怪呀」

「怕咩㗎 風仔遲左都會知嚟啦 係咪咁講呀」

「都係嘅 哈哈」我都唔好意思話唔好啦，咁我都想知多啲嘅，不過一陣又要氹返Chloe啦。

「風仔 有一件事我希望你可以認真答我」Chloe爹地突然之間問我。

「係 無問題」

「你係咪對我個女認真 想同佢長遠行落去」

「我係認真 今日我上嚟就係想同你地講 我想娶你地個女」我吞左啖口水，再一次過講。

第五十五章

「Uncle 我係認真 唔係玩玩下 我想娶你個女
雖然我地一齊左唔係好耐」

「好 夠坦白 我鍾意 如果阿女同意嘅 我地都無問題」

又估唔到Chloe爹咁會咁爽快。

「真係可以？」

「係 以我所知 你父母都ok 咁就無問題啦」

「多謝你地」

「不過如果你對我個女唔好 到時可能我會反對㗎」

「放心 我一定會對佢好好 唔會令佢唔開心」

「咁啊 我有啲說話要同風仔單獨講 風仔你跟我嚟書房」

「爹咁呀」Chloe好似唔係幾放心。

「乖女 你俾佢地傾吓啦」Chloe媽咪細細力拉住佢。

「係囉 爹咁唔會食左你男朋友嘅」

「咁好啦」

我跟Chloe爹咁去到書房。

「其實有啲野係關於我個女 但我唔想佢聽到之後會唔開心 咁所以 你明啦」

「我明白」

「佢之前拍過幾次拖 都有啲唔係咁好嘅經歷 我諗你都知」

「我淨係知佢上一個男朋友好似有第三者」我點一點頭。

「無錯 其實佢每次拍拖都係遇到呢啲事
我地都好擔心佢會唔會對愛情無左信心 以後都唔敢再拍拖」

「不過而家睇嚟我地嘅擔心都係多餘 佢終於搵到個好男仔」
佢望住我笑。

「唔係啦 我都成日激嬲佢嚟 俾左好多麻煩佢」

「不過我好耐都無見過佢咁開心 同你拍拖之後 佢個人開朗左好多」

「係咩 估唔到我竟然會影響左佢咁多」

「係呀 所以我地好放心將個女交俾你」

「放心 我一定會對佢好好 俾到幸福佢」

「唔怕同你講 當年我同佢媽咪都係拍左一年拖就決定結婚 因為呢樣係講求兩個人有幾了解同遷就對方」

「係嘅 我知道點做 好多謝你同我講咁多」

「乜說話㗎 我都盡返做爸爸嘅責任啫 我地出返去啦」

一出返去，Chloe就即刻走過嚟捉實我。

「點呀 爹地同你講左啲咩」

「無呀 講你啲衰野咋嘛 佢俾你細個啲相我睇 唔怕同你講 真係有啲驚嚇」我對Chloe爹地眨一眨眼。

「哦 係呀 你細細個一啲都唔似女仔 咁鬼粗魯 好彩而家都嫁得出」Chloe爹地加多把口。

連Chloe媽咪都忍唔到笑埋一份。

「喂呀 有無搞錯呀 你地夾埋蝦我」

第五十六章

過幾日我約左Chloe出去食晚餐，亦都係我做野嘅機會。

你今次仲唔死係我手上，我以後跟你姓，不過都無可能啦。

「喂 上次我爹地就係俾你睇我細個啲相咋」

「哦 係呀 我都嚇左一跳 差啲認唔出 原來你以前係...」

「咩啲 我幾歲嗰時媽咪覺得短頭髮方便啲 咪幫我剪短囉
大個睇返先發覺好肉酸 成個男仔咁 真係吖」

「唔係吖 靚女剪咩髮型都唔會差啲去邊」

「係咪㗎 成日都咁口花花」Chloe笑到腳左出聲。

「係吖嘛 不過你就...」我搖一搖頭。

「吓 啫係點」

「因為你唔係靚女囉」

「咩話 你而家係咪想死呀」佢即刻變面，明明頭先仲笑緊。

「係好靚女 所以你點剪都咁好睇」

「好過分囉你 成日都玩我 黐呀」佢扮黐，但被我睇到佢偷笑。

「但我見到有人笑啲」

「咩 笑你低B咋」

我地食飯嗰陣都係咁打打鬧鬧，都差唔多要到戲肉，

有啲緊張添，希望順利啦，俾到個surprise佢。

「啲人就快走晒啦 我地行未呀」Chloe問我。

「好 我地埋單啦 等陣 我去個廁所先」

我離開左Chloe視線範圍，就同個侍應示意要準備嚟料。

侍應行左去到我地張枱，

而我就去擺之前擺低嘅結他。

「唔該 幫我地埋單吖」Chloe同個侍應講。

「小姐呀 你唔使咁急㗎」

「吓 我唔明...」

「你望下後面就明架啦」

Chloe聽到就另轉頭，見到我擺住支結他。